CBETA電子佛典集成

CBETA Chinese Electronic Tripitaka Collection ebook

T16n0675

深密解脫經

元魏 菩提流支譯

目次

- 編輯說明
- 章節目次
 - 。深密解脫經序
 - 。1 序品(一)
 - 。2 聖者善問菩薩問品(一)
 - 。 3 聖者墨無竭菩薩問品(一)
 - 。4 聖者善清淨慧菩薩問品(一)
 - 5 禁命須菩提問品(一)
 - 6 聖者廣慧菩薩問品(一)
 - 。 7 聖者功德林菩薩問品(二)
 - 。 8 聖者成就第一義菩薩問品(二)
 - 。9 聖者彌勒菩薩問品(三-四)
 - ◦10 聖者觀世自在菩薩問品(四-五)
 - 。11 聖者文殊師利法王子菩薩問品(五)
- 券目次
 - · 001
 - · 002
 - · 003
 - · 004
 - · 005
- 贊助資訊

編輯說明

- 本電子書以「CBETA 電子佛典集成 Version 2022.Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta..org 回報。
- <u>版權所有</u>,歡迎自由流通,但禁止營利使用。

No. 675 [Nos. 676-679]

深密解脫經序

沙門都釋曇寧造

夫至迹虚微、理包言像之外,幽宗沖祕、旨絕名相之域,是以大聖 秉獨悟之靈,姿鏡寰中之妙趣。實相廓然,與虛無齊其量;法性憺 爾,與幽冥同其源。神輝潛映而不滅,萬相俱應而不生。然此生 也,生所不能生;此之滅也,滅所不能滅。顯既非有,隱豈為無? 寂焉而動、動焉而寂,出沒無方,教迹星羅者矣。

蓋《深密解脫經》者,乃兆聖之玄源、億善之淵府。論其旨也則真相不二,語其教也則湛然理一,義盡沖籍、文窮祕典,妙絕熙怡、包括群藏。自非詮于理教,何以顯茲深致?但東西音殊,理憑翻譯,非翻非譯,文義斯壅,所以久蘊而不顯者,良俟嘉運而光通矣。

大魏皇帝總六合以統天、包百王以馭字,道邁羲唐、德超古哲,而 每遊神覺典、妙翫大乘,思在翻演、鴻宣遐代。時有北天竺三藏法 師菩提留支——魏音道晞,曾為此地之沙門都統也——識性內融, 神機外朗,沖文玄藏,罔不該洞。以永熙二年龍次星紀,月呂蕤 賓,詔命三藏於顯陽殿高陞法座,披匣揮麈,口自翻譯,義語無 滯。

皇上尊經祇法,執翰輪首,下筆成句,文義雙顯,旨包群籍之祕 理、含眾典之奧,但萬機淵曠,無容終訖。捨筆之後,轉授沙門都 法師慧光、曇寧,在永寧上寺共律師僧辯、居士李廓等遵承上軌, 歲常翻演新經諸論,津悟恒沙。 帝亦時紆尊儀,飾茲玄席,同事名儒招玄、大統法師僧令、沙門都 法師僧澤、律師慧顒等十有餘僧。緇俗詵詵,法事隆盛,一言三 覆,慕盡窮微,是使深密祕藏光宣於景運,解脫妙義永流於遐劫。

理教淵廓,罔測其源,旨趣中絕,焉究其宗?所謂鹿苑之唱再興,祇園之風更顯者也。寧雖識昧,忝廁倫末,敢罄庸管,祇記云爾。

深密解脫經卷第一

元魏天竺三藏菩提流支譯

序品第一

歸命釋迦牟尼佛

如是我聞:

一時婆伽婆住法界殿如來境界處——眾寶赫焰一切莊嚴第一之處; 遍至無量諸世界處;放大光明普照之處;無量善巧差別住處;無有 分齊、過分齊處;過諸一切三界境界、出世間、上上善根境界成就 之處;善得清淨、自在解脫、無礙之處;諸佛如來神力住持之處; 無量菩薩眾所行處;無量諸眾天、龍、夜叉、乾闥婆、阿修羅、迦 樓羅、緊那羅、摩睺羅伽、人非人等之所行處;是大法界究竟滿足 喜樂之處;畢竟能與一切眾生利益之處;離諸一切煩惱垢處;離諸 一切諸魔、怨敵,諸佛住持莊嚴之處;大法意去之所明處;奢摩 他、毘婆舍那大乘之處;入空、無相、無願大解脫樂處;無量功德 眾大寶蓮華王之所莊嚴處——婆伽婆住如是等不可思議自在之處。

諸佛如來善覺所覺,離於二行,到無相處;行諸佛行,得諸如來一切平等,到無障礙之所去處;能到一切不退法輪、能到不可降伏境界、不可思議體、能到一切三世平等、遍至一切諸世界身、到於諸法無疑之處;能到一切究竟智行、悉能到於法智無疑、得諸一切無

分別身、能答一切菩薩問智、能到無二行之彼岸、能到諸佛無有差別解脫智處;能到無邊無中三昧,境界廣大如法界、究竟如虛空;盡未來際與諸無量聲聞眾俱一一心善調伏,皆是佛子,善得心解脫、善得慧解脫、善得清淨戒,求法者與樂,成就多聞、住持多聞、具足多聞,善思所思、善說所說、善作所作,善得一切速疾般若、善得一切疾去般若、善得一切猛利般若,具足三明,見第一法,得究竟行,能作清淨,受大施主具足成就、寂靜威儀畢竟成就,忍辱柔和,善受佛教,能如說行。

時諸無量大菩薩眾,皆從無量種種佛土而來集會——是諸菩薩皆住一切所求大處,畢竟能取無上大法,得一切眾生平等之心,離諸一切分別,分別降伏一切諸魔、怨敵,離諸一切聲聞、辟支佛之所念處,得大法味喜樂具足,過五怖畏得不退地,一乘之體現前,能滅一切眾生怖畏之地——如是等,不可說、不可思、不可稱、不可量、不可數菩薩眾俱。

聖者善問菩薩問品第二

爾時,婆伽婆百千萬阿僧祇大眾前後圍遶,為諸菩薩說甚深法。

時大眾中有聖者菩薩摩訶薩,名曰善問,在眾中坐,即依無言無有二相第一義諦,問聖者深密解脫菩薩言:「佛子!言一切法不二。 一切法不二者,何者為一切法?云何名不二?」

爾時,深密解脫菩薩告善問菩薩言:「善男子!言一切法者有二種。何等為二?一者、有為法,二者、無為法。善男子!有為法者,非有為、非無為;無為法者,非有為、非無為。」

善問菩薩言:「佛子!云何有為法,非有為、非無為?云何無為 法,非有為、非無為?」 深密解脫菩薩言:「善男子!言有為法者,惟是如來名字說法。所言如來名字說法者,惟分別言語名為說法。善男子!若惟名字分別言語名說法者,常不如是,但種種名字聚集言語成。是故,言非有為。善男子!言無為者,惟言語體。善男子!假使離於有為、無為者,彼法亦如是。

「善男子!雖無言語而不空說事。佛子!何者為事而言不空說?所謂聖人知聖人見、聖智知聖見見,無言所證。為欲說彼無言語法,依相說彼有為、無為。善男子!言無為者,惟是如來名字說法;名字說法者,是分別相;分別相者,即言語相。善男子!言語相者,即是名字之所集法;名字集者,是虛妄法;虛妄法者,常無如是體,種種分別名字不成即言語相。是故,我說非無為。善男子!言有為者,但是名字。若離有為、無為法者,彼亦如是。善男子!而非無事說彼言語。善男子!何者為事而言聖智知、聖智見?無言證法。無言證法故,說名非有為。」

善問菩薩言:「佛子!云何彼事無言所證,聖智知、聖智見,而言 為彼無言證法說彼有為、無為言語?」

深密解脫菩薩言:「善男子!譬如幻師、幻師弟子住四衢道,積聚草木、枝葉、瓦石在於一處,示現種種幻術所作,所謂象、馬、車、步諸兵,摩尼、真珠、琉璃、珂貝、珊瑚、虎珀、車璩、馬瑙、錢財、穀帛、庫藏諸物,示如是等種種異事。善男子!有諸愚癡無智凡夫見聞彼事,不知彼是草木、瓦石,生如是心:『實有此諸象、馬、車、步、摩尼、真珠、瑠璃、珂貝、珊瑚、虎珀、車璩、馬瑙、錢財、穀帛、庫藏等物,以現見故。』彼愚癡人如是見聞,即取修行,畢竟為實、餘者虛妄。善男子!彼人復更須求上上法。

「善男子!復有智慧非愚癡者,見象、馬等,知是草木、瓦石等體。彼人見聞生如是心:『彼諸如是象、馬、車等,我見非實,此幻所作,有此象、馬、車、步兵等虛妄之相,種種異事幻惑人眼。』彼智慧人如所見聞,不取為實、亦不執著,亦不取此畢竟為實、餘者虛妄,而知為義取彼言語,此人不須更觀勝法。

「善男子!凡夫眾生未得聖人出世間智亦復如是。凡夫愚癡,不如實知無言語法,見聞有為、無為之法,生如是心:『有此有為、無為之法,如我見聞。』是故,彼人如所見聞,畢竟而取執著為實,如所見聞如是受行——此畢竟實,餘者虛妄——彼人更須觀察勝法。

「善男子!復有眾生非是愚癡,見於實諦得諸聖人出世間智,如實能知一切諸法,證無言語真實法體,而彼眾生見聞有為、無為之法,生如是心:『如所見聞,無如是等有為、無為名字等法。』復作是念:『有此有為、無為言說,從虛妄分別行相而生,如彼幻法迷惑於智,以生有為、無為異異名相。』彼人了知,不如見聞如是取著一一此是真實,餘者虛妄——為顯彼義而取言語,彼人不須更觀勝法。

「善男子!如是彼事——聖人智知、聖人見見——無言所證,為欲證彼無言之法,說彼有為、無為名相。」

爾時,深密解脫菩薩而說偈言:

「深義無言語, 諸佛說不二。 癡人依無明, 戲論著二法, 長行世間道, 往來無休息, 生於畜生中, 以離第一義。」

聖者曇無竭菩薩問品第三

爾時,聖者曇無竭菩薩摩訶薩,依於如實第一義諦過諸一切世間覺 觀境界之相,白佛言:「世尊!我憶過去世、復過彼過去世,離此 世界七十七恒河沙世界、過彼無量恒河沙世界已,有佛國土,號名稱世界,彼中有佛名毘摩羅吉諦如來,住彼國土。我於爾時遊化眾 生往彼世界。爾時,見有一外道師止住一處,有七萬七千弟子聚集 其所,依第一義相思惟諸法。彼諸外道迭共推覓第一義相、稱量第一義相、思惟第一義相,觀察不見第一義相,生異異意、異異見、 異異執著,立異朋黨起於諍論,口力交諍出不善言,迭共相亂起散而去。世尊!我於爾時即生心念:『希有,諸佛如來出世。以依如來出世間故,今得見聞過於一切世間境界第一義相、得證第一義相、見第一義相、證一切滅相。』」

爾時,世尊告曇無竭菩薩言:「曇無竭!如是,如是。我覺過諸世間境界第一義相,如是覺已而為人說、以示於人、顯示於人,建立是法。何以故?我為聖人說我內身自所證法、為諸凡夫說覺觀境界,迭共所知。曇無竭!汝今當依此義而知所謂過諸世間境界是第一義相。

「復次,曇無竭!我說第一義者,是過一切諸相境界,覺觀是名諸相境界;如是,我說第一義者是無言境界,覺觀是名言說境界。曇無竭!我說離諸言語是第一義相,覺觀名字是世諦相;如是,我說離諸諍論是第一義相,覺觀名字是諍論相。曇無竭!依此義相,汝今應知過諸世間覺觀境界是第一義相。

「曇無竭!譬如有人,盡於一形噉辛苦味、樂辛苦味,彼人不能 知、不能覺、不能量、不能信石蜜、阿婆婆等甘美之味。

「曇無竭!有人長夜信貪欲樂、樂著貪欲、為貪欲火燒內心,身不 能知、不能覺、不能量、不能信離諸一切色、聲、香、味、觸無貪 欲樂。 「曇無竭!有人長夜信分別樂、樂於分別,不能知、不能覺、不能量、不能信內身寂靜無分別樂。

「曇無竭!有人長夜樂見聞覺知樂,信樂而行,彼人不能知、不能 覺、不能量、不能信內身寂滅離見聞覺知樂。

「曇無竭!如人長夜取我我相樂,信樂而行,彼人不能知、不能 覺、不能量、不能信北欝單越無我我所樂。

「曇無竭!如是覺觀之人,不能知、不能覺、不能量、不能信離諸覺觀第一義相。」

爾時,世尊而說偈言:

「我說身證法, 第一離言境, 離覺觀諍相, 無言第一義。」

聖者善清淨慧菩薩問品第四

爾時,聖者善清淨慧菩薩摩訶薩,依第一義過一異相,白佛言:「世尊!世尊善說希有妙法第一義諦——微細極細甚深之義過一異相一一所謂難證。世尊!我憶往昔在於一處,見住信行地諸菩薩等集坐一處,思有為行、第一義諦為一、為異?有諸菩薩言:『有為行相異第一義。』復有菩薩作如是言:『非有為行異第一義。』而作是言:『有為之行不異第一義。』復有菩薩生於疑心而起異意,作如是言:『此諸菩薩中,何者是實說?何者虚妄說?何者是正念修行法?何者是邪念修行法?』世尊!我見彼諸菩薩,作是思惟:『此諸善男子等皆是愚癡,非善黠慧,不善知法,墮邪念中。』何以故?以不能知有為之行微細無相,過一異相,第一義相故。」

爾時,佛告善清淨慧菩薩摩訶薩言:「善清淨慧!如是,如是。彼諸一切善男子等皆是愚癡,不善黠慧,不知正法,墮邪念中。何以

故?以不能知微細行相過一異相,第一義相故。何以故?善清淨慧!若有為行不異第一義相者,一切愚癡諸凡夫等悉亦應見第一義諦即凡夫身,亦應得彼無上清淨涅槃之樂,亦應得彼阿耨多羅三藐三菩提。

「善清淨慧!若有為行不異第一義相者,見第一義諦時應見有為行相。若有為行相是有相者,相即是縛,不應得解脫。若見實諦不離相縛者,不應得解亦不得脫煩惱之縛;以不離彼二種縛故,不應得彼無上清淨涅槃之樂,亦不應得阿耨多羅三藐三菩提。

「善清淨慧!以是義故,愚癡凡夫不見實諦,亦非即此凡夫之身得彼無上清淨涅槃,亦非即彼凡夫之身能得阿耨多羅三藐三菩提。是故,見實諦者不應見彼有為、無為行相一之與異。是故,彼人見有為行相、第一義相,一、異之義不成一、異。善清淨慧!汝當應知,彼諸菩薩言有為之行、第一義相是一、是異者,彼諸菩薩非正念,是邪念。

「復次,善清淨慧!若有為行相、第一義相二不異者,如有為行墮 在染相,第一義相亦應墮染。善清淨慧!若有為行相離第一義相異 者,如是,一切有為之行不應與彼第一義同故。善清淨慧!第一義 諦不墮一切煩惱染中,以是得言有為之行、第一義諦得言同相。是 故,善清淨慧!汝不應言有為行相、第一義諦有一、有異。

「復次,善清淨慧!若有為行相、第一義相二不異者,第一義諦不 異有為一切諸行,如是一切有為之行亦應不異第一義相;而彼有為 異第一義——若不異者,如實行者見聞覺知有為行相,不應更求無 上勝法。

「善清淨慧!若有為行相、第一義相不異者,即有為行應名無我無 自體相,是第一義相。 「善清淨慧!復有過失,謂於一時差別異相——此是染相、此是淨相。是故,善清淨慧!第一義相異有為行相,而非不異有為行相。 是故,彼諸如實行者見聞覺知,更求勝法。以如實知有為行故,得 於無我第一義名,而不一時有染、有淨二相差別。是故,離彼有為 行相、第一義相,不一、不異,義亦不成。

「善清淨慧!彼諸菩薩作如是言:『有為行相、第一義相,不一、 不異者,彼諸菩薩不名善說。』善清淨慧!汝當應知,彼諸菩薩不 名正念如實修行,是名邪念。

「善清淨慧!譬如珂白不可說一、不可說異;如是,金黃箜篌妙聲、沈水香味、蓽茇辛味、訶梨勒苦味、苷蔗甜味、兜羅柔軟蘇,乃至醍醐,不可說一、不可說異。善清淨慧!如是,一切有為行體、無常之相,不可說一、不可說異;一切有漏、所有苦相,不可說一、不可說異;一切法中無、我之相,不可說一、不可說異;貪瞋癡染、不寂靜相,不可說一、不可說異。善清淨慧!如是,一切有為之行、第一義相,不可說一、不可說異。

「善清淨慧!如是,我得細微細深甚深難證極難證過一異相第一義諦覺,覺已為人說示、開示、現示、建立。」

爾時,如來而說偈言:

「有為界、實諦, 一、異相離相, 若分別一、異, 彼癡非正念。 彼人為相縛, 及為煩惱縛, 修毘婆奢那、 奢摩他得脫。」

慧命須菩提問品第五

爾時,世尊依一切處一味等味第一義諦,告慧命須菩提言:「須菩提!汝知一切眾生界中,幾所眾生依我依慢說我所得?須菩提!汝

知一切眾生界中,幾所眾生離我離慢說我所得?」

須菩提白佛言:「世尊!我於眾生界中,實少見眾生離我我慢說我 所得。世尊!而我實見無量阿僧祇不可說眾生,於眾生界中依我我 慢說我所得。

「世尊!如我憶念過去世時住於一處阿蘭若園,爾時多有諸比丘等依於我所四面而住。世尊!我於爾時見彼比丘於日西下一處聚集,取種種法相說所證諦法。世尊!有諸比丘取於陰相說為證法、有諸比丘見陰生相說為證法、有諸比丘見陰滅相說為證法、有諸比丘則陰滅現證法、有諸比丘見於入相說為證法、有諸比丘取十二因緣相說為證法、有諸比丘取起行相說為證法、有諸比丘取於諦相說為證法、有諸比丘取諦因相說為證法、有諸比丘取部相說為證法、有諸比丘取離諦相說為證法、有諸比丘取離諦相說為證法、有諸比丘取釋活相說為證法、有諸比丘取界法相說為證法、有諸比丘取於界相說為證法、有諸比丘取種種界相說為證法、有諸比丘取無量界相說為證法、有諸比丘取滅界相說為證法、有諸比丘取滅界相說為證法、有諸比丘取滅界相說為證法、有諸比丘取滅界相說為證法、有諸比丘取滅界相說為證法、有諸比丘取滅界相說為證法、有諸比丘取滅界相說為證法、有諸比丘取滅界

「如是,諸比丘取四念處相說為證法、有諸比丘取四念相說為證法、有諸比丘取四念處對對治相說為證法、有諸比丘取四念處修行相說為證法、有諸比丘取未生四念處為生四念處修行相故說為證法、有諸比丘取已生四念處為不失修行相故說為證法、有諸比丘取已生四念處為滿人修行相故說為證法。

「如是,諸比丘取正勤、如意、根、力、覺、道,未生、為生、為 住、為不忘失、為增廣,取相說為證法。

「世尊!我見彼諸比丘生如是念: 『是諸比丘以著我相、取我慢相如是說證。何以故?以不能知第一義諦一味等味相。』是故,世

尊!我作是念:『世尊出世,希有希有,善說勝法——切處第一義一味等味——微妙甚深,難覺難知,何況外道而能得解?』」

佛告須菩提:「如是,如是。如汝所說,我所證法細微、極微, 深、甚深、極甚深,難覺、極難覺。一切處一味等味相第一義諦是 我所證,證已為人開示、演說示、極示、開示、現示。何以故?須 菩提!所謂陰界入、因緣起行、實諦境界、念處、正勤、如意、 根、力、覺、道等,須菩提!我說五陰中清淨觀三十七品是第一義 相,一切陰界入、念處、正勤、如意、根、力、覺、道一味等味 相。須菩提!依於此義,汝今應知一切處一味等味第一義相。

「復次,須菩提!如實修行比丘,如實知一陰如第一義諦法無我, 於餘界入、因緣起行界、念處、正勤、如意、根、力、覺、道等, 更不別觀真如第一義法無我,惟依隨順真如、依止不二法,證一切 處一味等味第一義相。須菩提!汝依此義,應如是知所謂一味等味 第一義相。

「復次,須菩提!如彼陰界人、因緣起行界、念處、正勤、如意、根、力、覺、道等彼差別,若真如第一義諦法無我有差別相者,真如證法第一義諦亦應有因;若有因者,應從因生;若從因生,應是有為;若是有為,不應得名第一義諦;若非第一義諦者,應更推求第一義諦。須菩提!是故,真如第一義諦法無我,非從因生,亦非有為法,亦非不第一義諦,亦非為彼第一義諦更求第一義諦;惟是常常時、恒恒時,如來出世、若不出世,法性常住、法體常住、法界常住。須菩提!汝依此義,應知此諸一切法相一味等味第一義諦。

「須菩提!譬如無量種種差別,色相無相、無有分別、無有差異, 一切處虛空等味一體、一相。須菩提!一切諸法自相差別,一切處 一味等味第一義相。」 爾時,世尊而說偈言:

「如來應說法, 一切一味相, 不離第一義, 見別是憍慢。」

聖者廣慧菩薩問品第六

爾時,聖者廣慧菩薩摩訶薩,依於心相,白佛言:「世尊!如來說 諸菩薩善知心意意識深密法者,世尊!云何菩薩善知心意意識深密 之法?世尊!以何義故如來說諸菩薩善知心意意識深密之法?」

爾時,世尊告廣慧菩薩言:「善哉,善哉。廣慧!汝今乃能問於如來如此深義。廣慧!汝能為與一切眾生安隱樂具,悉令滿足。廣慧!汝為哀愍一切天人,多所安樂、多所饒益,乃能問我如是之義。善哉,廣慧!諦聽,諦聽。我為汝說心意意識深密之義。

「廣慧!於諸六道生死之中,何等何等眾生——卵生、胎生、濕生、化生——受身、生身及增長身?初有一切種子心生,和合不同,差別增長,廣所成就,依二種取。何等二種?一者、謂依色心根取,二者、依於不分別相言語戲論熏集而取。廣慧!色界中依二種取生,無色界中非二種取生。

「廣慧!彼識名阿陀那識。何以故?以彼阿陀那識取此身相應身故。廣慧!亦名阿梨耶識。何以故?以彼身中住著故、一體相應故。廣慧!亦名為心。何以故?以彼心為色、聲、香、味、觸、法增長故。

「廣慧!依彼阿陀那識能生六種識,所謂眼、耳、鼻、舌、身、意識身。廣慧!若一境界現前,一識身起,無分別意識即共眼識一時俱生。廣慧!若二、三、四、五境界現前,五識身起,無分別意識即與五識一時俱生。

「廣慧!譬如流水,若一緣起即生一波,若二、若三乃至眾多因緣 俱起即生眾波。廣慧!而彼流水亦不斷絕。

「復次,廣慧!譬如無垢清淨明鏡,若有一像因緣現前,即見一像,若有二、三、眾多像現,即能具見眾多異像。廣慧!而彼明鏡為彼種種諸像不異。

「廣慧!如彼流水、明鏡像等,依止阿陀那識、住持阿陀那識,若 一眼識因緣現前,即一意識共彼眼識同時取境。廣慧!若五識身五 種因緣一時現前,無分別意識即共五識一時取境。

「廣慧!如是,菩薩摩訶薩依法住智,如實善知心意意識深密之法。廣慧!而佛不說諸菩薩等是善解知心意意識深密之法。廣慧!若菩薩不見內外阿陀那、不見阿陀那識,能如實知;不見阿梨耶、不見阿梨耶識、不戲論心,不見眼、不見色、不見眼識,不見耳、不見聲、不見耳識,不見鼻、不見香、不見鼻識,不見舌、不見味、不見舌識,不見身、不見觸、不見身識,廣慧!菩薩不見內外意、不見內外法、不見內外意識,能如實知。廣慧!我說如是諸菩薩等善知第一義。廣慧!是故,我說菩薩應知心意意識深密之法。廣慧!菩薩如是解知心意意識深密法已,我說是人是真菩薩。」

爾時,世尊而說偈言:

「諸種阿陀那, 能生於諸法, 我說水、鏡喻, 不為愚人說。」

深密解脫經卷第一

聖者功德林菩薩問品第七

爾時,聖者功德林菩薩摩訶薩,依一切法相,白佛言:「世尊!世尊說諸菩薩善知法相。世尊!菩薩善知諸法相者,云何名善知諸法相?世尊!菩薩能知幾種法故,名為善知一切法相,而如來說菩薩善知一切法相?」

爾時,佛告功德林菩薩摩訶薩言:「善哉,善哉!功德林!汝今乃能問佛此義。功德林!汝能為與一切眾生安隱樂具,悉令滿足。功德林!汝能哀愍一切人天,多所安樂、多所饒益,乃能問我如是之義。善哉,善哉!功德林!汝今一心諦聽諦聽,我為汝說。

「功德林!一切法相有三種相。何等為三?所謂虛妄分別相、因緣相、第一義相。功德林!何者虛妄分別相?所謂名相所說法體,及種種相名、用義等。功德林!何者諸法因緣之相?所謂十二因緣,依此法生彼法,謂依無明緣行,乃至生大苦聚處。功德林!何者是諸法第一義相?所謂諸法真如之體,諸菩薩等正念修行、至心修行證不二法,證彼法已乃至得成就阿耨多羅三藐三菩提。

「功德林!譬如有人目中有瞖,是眼識過。功德林!虛妄分別亦復如是。功德林!譬如有人眼中有瞖,見毛輪繩及胡麻子,青、黃、赤、白等相現前。功德林!因緣之相亦復如是。功德林!譬如有人眼淨無濁,離眼瞖過,即彼眼見自性境界不生迷惑。功德林!第一義相亦復如是。

「功德林!譬如世間清淨琉璃置青色中,即因陀羅青色出大因陀羅 摩尼寶光明,因陀羅青色,大因陀羅摩尼之寶光明現前,迷惑眾生 以為實寶。功德林!即彼清淨琉璃之體置赤色中,即出赤波頭摩摩尼之寶光明現前,迷惑眾生以為赤寶。功德林!即彼清淨琉璃之體置綠色中,即出綠色摩尼之寶光明現前,迷惑眾生以為綠寶。功德林!即彼清淨琉璃之體置黃色中,即出金色摩尼之寶光明現前,迷惑眾生以為金寶。功德林!如彼清淨琉璃之中種種異色;如是,他力因緣相中虛妄分別名字、章句、熏習之體,亦爾應知。

「功德林!如彼清淨琉璃因陀羅青色、大因陀羅青色,因赤色、綠色、黃色為金等寶種種現前,迷惑眾生皆以為寶。功德林!如是,他力因緣相中虛妄分別名字、章句亦爾應知。功德林!如彼清淨白琉璃體,他力因緣亦爾應知。功德林!即彼清淨琉璃之體,無彼因陀羅青色、大因陀羅青色,無彼青寶、赤、綠、黃金等寶如是寶體,常常時、恒恒時無如是等一切寶體。

「功德林!即彼他力因緣相中,彼虛妄分別名字、章句,常常時、 恒恒時無如是等虛妄分別名字、章句體相應知。功德林!而依名相 因緣分別因緣相應知。功德林!依虛妄因緣執著名相,是故見他力 因緣。

「功德林!依他力因緣執著虛妄分別之相,見第一義相。功德林! 菩薩於彼因緣相中如實能知是知虛妄分別之相,菩薩爾時名為能知 諸法無相。功德林!菩薩若知因緣法相,如實知諸因緣法已,能如 實知諸法染相;能如實知染相法已,能知第一義相;能如實知第一 義相已,能如實知清淨法相。

「功德林!菩薩若於他力因緣法中能如實知無相之法,如實知已, 遠離染法;離染法已,得證一切清淨法相。功德林!菩薩如實能知 虚妄法相、能知他力因緣法相、能知第一義相、無相,如實能知染 相、淨相,離染法相、證淨法相。功德林!菩薩摩訶薩應當如是善 知諸法。是故,佛說菩薩摩訶薩善知諸法。」

爾時,世尊而說傷言:

「如實知諸法, 即捨染法相; 捨染法相已, 證於清淨法。 不觀有為過、 懈怠、放逸害, 諸法常不動, 離相名菩薩。」

聖者成就第一義菩薩問品第八

爾時,聖者成就第一義菩薩,依無體相第一義相,白佛言:「世尊!世尊!我獨在於空閑之處生覺觀心,作如是念:『如來種種說於諸陰自體相法,所謂能知生滅之相,離於如是諸人因緣而起諸行;如是說諸諦自體相,所謂知離證修;如是說諸界自體相、種種別相、種種界相、無量界相;如是說諸念處、正勤、如意、根、力、覺、道自體,對治修行,未生令生、已生令增廣。世尊復說,一切法本來無體、一切法本來不生、一切法本來不滅、一切法本來寂靜、一切法本來自性涅槃。』世尊!是故我問如來此義,如來何意作如是說?」

爾時,佛告成就第一義菩薩言:「善哉,善哉!成就第一義!汝能如是正念思惟,生此覺觀。」復言:「善哉。成就第一義!汝今乃能問佛此義。何以故?汝為安樂一切眾生、安隱一切眾生、為欲利益一切眾生、安隱一切天人,故問此義。成就第一義!汝一心聽,我意何故作如是說,一切法本來無體相、一切法本來不生、一切法本來不滅、一切法本來寂靜、一切法本來涅槃?

「成就第一義!我意依諸法三種無體相,作如是說,一切諸法無自體相。何等為三?所謂依諸法無自體相、無生體相、第一義諦無自體相。成就第一義!諸法無自體相者,諸分別相。何以故?以彼諸法隨名相說,非有自體,是故我言無自體相。成就第一義!何者諸法無體相?謂諸法無體相。何以故?以彼生法依他力因緣,非自

體相,是故我說無生體相。成就第一義!何者是第一義無體相?成就第一義!第一義無體相者,一切諸法本無生體,是故我說一切諸法無自體相,以彼依於因緣生故、以依第一義無體相故。何以故?成就第一義!於諸法中清淨觀相,我說彼是第一義相。

「成就第一義!以他力相中清淨觀故,是故我說第一義諦無自體相。成就第一義!一切諸法無成就相,是故我說彼第一義諦無自體相。何以故?成就第一義!諸法無我、無我體相,是故我說彼一切法無自體相。成就第一義!以是,彼法依無體得名,是故我說第一義諦無自體相。成就第一義!如空中華無自體相,一切諸法無自體相亦復如是。是故,我說一切諸法無自體相,法應如是,應知。

「成就第一義!譬如幻作種種色像,諸因緣法無自體相亦復如是。 是故,我說一切諸法無自體相。成就第一義!第一義諦無自體相亦 復如是。是故,我說第一義諦無自體相。成就第一義!如空中華 色,無體相得名。如是,第一義諦無自體相亦復如是。成就第一 義!我意依此三種法無體相故,說言諸法無自體相法。

「復次,成就第一義!我意依相無自體相,說言諸法無自體相,彼 法本來不生、彼法本來不滅、彼法本來寂靜、彼法本來涅槃。何以 故?成就第一義!若一切法無自體相,彼法不生;若法不生,彼法 不滅;若不滅、不生,彼法本來寂靜;若法本來寂靜,彼法本來清 淨;若法本來清淨,彼法本來涅槃。若如是,彼法無有少法可滅令 入涅槃。成就第一義!是故我意依彼相說彼法無自體相,是故我說 一切諸法本來不生。

「復次,成就第一義!第一義者,依無我得名,是故我意依第一義無體相故,說言諸法本來不生。何以故?成就第一義!以第一義法無我得名,是故名為第一義諦無自體相,常常時、恒恒時一切法體常住——謂無為體——離諸一切煩惱相應。若法常常時、恒恒時依

彼法體住彼法,不生、不滅,以無為故。若法無為,彼法本來寂靜;若法本來寂靜,彼法本來涅槃,以遠離一切煩惱、毒相應故。 是故,第一義法無我得名,我說諸法無自體相,一切法本來不生、 一切法本來不滅、一切法本來寂靜、一切法本來涅槃。

「成就第一義!一切眾生眾生界中不知不覺虛妄分別法體差別,亦不能知他力因緣法體差別,亦復不見第一義諦法體差別,是故我說三種法無自體相。成就第一義!而諸眾生虛妄分別諸法體相、他力法體、第一義體,虛妄分別名字體相、說因緣法、第一義法。成就第一義!一切眾生如是如是說、如是受用,依名字心、依隨順心、依名用使心,依彼分別名字體相,執著他力、因緣法體、第一義體。

「成就第一義!如是如是執著,如是如是依他力法虛妄執著因緣法體,依彼因緣生未來世他力法體,為煩惱染、業染、生染,流轉六道,長夜受苦,不能出離生死苦縛,所謂地獄、畜生、餓鬼、阿修羅、天、人諸趣。

「成就第一義!隨所有眾生不種善根、不能清淨一切罪業、不能成就諸善根力、不多信法、不集功德智慧之業,我為彼說諸法不生。 彼諸眾生聞我所說因緣和合有為行生,彼眾生知諸法無常不恒、不可歸依、異異轉滅,於諸一切有為行中生驚怖心、生遠離心。生驚怖心、生遠離心已,彼諸眾生不行惡法、修行善法,修行善法者依善法因、不種善根者種諸善根、不清淨罪業者清淨罪業、不成熟諸根者能令成熟,依彼成熟善根力故能多信法,多信法者能集功德智慧之藏。

「成就第一義!彼諸眾生雖種善根,乃至能集一切功德智慧之藏, 成就第一義!而彼眾生於彼因緣諸法之體、無生體相及第一義無體 相法不如實知,不如實知故,於諸一切有為行中不能生厭、不能遠離。是故,彼諸一切眾生不得解脫煩惱染、業染、生染。

「成就第一義!如來為彼諸眾生故,重說彼法——所謂因緣無體、第一義無體——令彼眾生於有為行生厭離心,為得解脫煩惱染、業染、生染。彼諸眾生聞我所說,於彼諸法無生相中、於一切法虛妄分別中、第一義諦無體相中能生正信,思惟彼法,如實覺知,於他力中不生執著、虛妄分別諸法體相,但知唯是名用得名、唯是隨順名用得名、唯是隨順名用彼諸煩惱得名。是故,彼諸一切眾生能滅他力因緣諸相,依於現法智慧之力斷彼未來一切因緣。是故,依彼因緣正見能離一切有為諸行;厭離一切有為行已,得正解脫,遠離業染、煩惱染、生染。

「成就第一義!聲聞性眾生依此道、依此法,得聲聞涅槃;緣覺性眾生亦復如是,依此道、依此法,得緣覺涅槃;佛乘性眾生亦復如是,依此道、依此法,得阿耨多羅三藐三菩提。成就第一義!是故,我說聲聞、緣覺、菩薩一清淨道。成就第一義!唯一清淨道,更無第二,我意依此故說一乘。

「成就第一義!而眾生界中非無種種性軟中上根眾生。成就第一義!寂滅聲聞性人,一切諸佛盡力教化,不能令其坐於道場得阿耨多羅三藐三菩提。何以故?成就第一義!以彼自性本來狹劣,一向少於慈悲之心、一向怖畏一切諸苦、以少慈悲一向捨於利益眾生。成就第一義!若一向畏苦、一向離諸有為之行,彼人遠離利益眾生、遠離能度諸眾生業。是故,我說彼人不能證阿耨多羅三藐三菩提,我說名為寂滅聲聞。

「成就第一義!發菩提心聲聞人者,而我說彼名為菩薩。何以故? 以彼菩薩先離煩惱障得慧解脫、後離智障得心解脫,彼菩薩如來初 化,依自身利益而得解脫。是故,我說彼是聲聞性人菩薩。 「成就第一義!我善說法中、善如意法中、善毘尼法中、善清淨法中、清淨法中,不錯依種種性說種種法相。成就第一義!是故,佛意依此三種無體相法,說不了義修多羅法,所謂諸法本來不生、本來不滅、本來寂靜、本來涅槃。

「成就第一義!若有眾生種諸一切增上善根、清淨罪業、成就諸根、多信諸法、善集一切善根智慧,彼諸眾生聞我法音能如實知,彼諸眾生信我法、信我義,智慧觀察能如實覺,依彼證法隨順行力,速得究竟阿耨多羅三藐三菩提。我依彼諸一切眾生能於我身生恭敬心作如是言:『此是正覺,知一切法,是故名為應正遍知。』

「成就第一義!若有眾生不種一切增上善根、不能清淨一切罪業、不能淳熟一切善根、不多信法、無增上心、不集功德智慧之藏、直心體性、不能觀察是法非法——是法可取、是法可捨,依自心見執著而行——彼諸眾生雖聞我法,亦復不知依何意說。而彼眾生信於我法、恭敬我法,而作是言:『我信諸佛如來所說修多羅,甚深甚深相、依空相應、難見難覺、不可覺形相、不可覺微細極微、黠慧人智慧境界,如來說諸修多羅義我不能知。』默然而信而作是言:『諸佛如來菩提甚深,諸法體相亦復甚深,唯佛所知,非我境界。諸佛如來隨諸眾生種種信心說種種法,以諸如來無量智慧所知如海,而我知見如牛跡水。』是故,眾生於彼修多羅若,能至心受持、書寫,寫已住持、讀示、供養、為他人說、誦常誦、隨喜施他,而彼眾生不能於中如實修行,以未知我甚深之意,以不覺故。成就第一義!彼諸眾生依因彼故,功德、智慧增長滿足,亦復令彼未淳熟心令得淳熟。

「成就第一義!復有眾生眾生界中不能種諸一切善根,乃至不能成就功德智慧之業,無直心、無直意,而彼眾生知是法、是非法,是可取、是可捨,自智生見是可取、是可捨,而彼眾生聞我所說甚深之法不知我意,是故不知如實之法。不知如實法故,不能覺知一切

諸法;聞聲執著義亦如是。是故,彼諸一切眾生說如是言:『諸法無體相,一切法本來不生、一切法本來不滅、一切法本來寂靜、一切法本來涅槃。』而彼眾生依因此見,於諸法中起於邪見、無諸法相墮於邪見,以見諸法無無相。以見諸法無無相故,而謗一切諸法為無,所謂虛妄分別相、因緣法體相、第一義法體相。何以故?成就第一義!依彼他力、因緣體相,依於第一義諦體相,有名字相。成就第一義!若眾生見因緣體相、第一義相言是無相,彼眾生謗假名名字相,是故我說彼諸眾生謗三種相。

「成就第一義!彼諸眾生於無法中起法相、於無義中生義相,無法依法住持、無義依義住持。成就第一義!彼諸眾生依我信法增長善法,而取非義為義,智不增長。智不增長者,離諸善法,於聞法眾生住持是法,法住持非義為義墮於邪見,彼諸眾生以取無法法相、無義義相。以取無法法、非義義相,是故,彼諸一切眾生依不正見離諸善法。

「應知,成就第一義!復有眾生於彼邪見人邊聞法,說如是言: 『諸法無體,不生、不滅、寂靜、涅槃。』驚懼怖畏而說是言: 『此非佛語,是魔所說。』是故,彼諸邪見眾生謗諸修多羅、說諸 修多羅、毀諸修多羅,言是非法。而彼眾生因彼謗法得無量罪,成 就無量極惡罪業。

「成就第一義!是故,我說謗法眾生見無諸法、亦無於義依義說法,成就無量極惡罪業,亦令無量諸眾生等多生罪業。

「成就第一義!若有眾生不種善根、不清淨罪業、不熟身業、多不信法、不能集彼功德智慧、不直心、不隨順直心,而依自見邪智分別是法、非法,是法可取、是法可捨,彼諸眾生雖聞我法,不得我意、不生信心、亦復不能如實知我所說之意。是故,彼諸一切眾生於諸非法生於法想、於諸非義生於義想,執著非法生是法想、執著

非義生是義想,而作是言: 『此非佛語,是魔所說。』而彼邪智如是解故,而謗諸法、不順諸法、毀呰諸法、輕論諸法、於正法中加置邪法,為滅修多羅、為壞修多羅、為不行修多羅、為不說修多羅、於信修多羅者生怨家想。彼諸眾生先有無量罪業重障,復因謗法而謗於人,轉更增長無量罪障,而彼罪障根本之罪不可說盡,何況復加謗法之罪?墮大地獄無有出期,乃至無量百千萬億阿僧祇劫說其歲數亦不能盡。

「成就第一義!我今善說如是諸法、善示善清淨、善說眾生如是種 種異信、種種異見。」

爾時,世尊而說偈言:

「無法體不生、 本寂靜、不滅、

自性涅槃法, 是故我說常。

三種無體相, 第一義無體,

若能知我意, 是人得解脫。

一道法進趣, 諸眾生解脫,

是故一乘法, 隨聞差別說。

諸眾生無量, 為身求涅槃,

如來甚希有, 安隱諸眾生。

若證無漏界, 平等無二相,

成就佛諸義, 彼人離煩惱。」

爾時,成就第一義菩薩白佛言:「希有,世尊!未曾有、未曾聞,如來所說如是微細、極微細,甚深、極甚深,難覺、極難覺,諸佛如來意趣難知。

「世尊!我知如來所說義意:所謂分別境界彼依分別有為行相,於 名字中說彼色陰自體相相名為勝相,所謂色陰生、色陰滅、離色 陰、知色陰。是故,如來依彼法相,說彼諸法為無體相。 「世尊!彼分別境界,依彼分別境界行相是他力相。是故,如來依 於彼法,而說諸法不生、諸法無體,亦依彼法說第一義言無體相。

「世尊!我知世尊所說法義:謂即依彼分別境界虛妄分別有為行相,即彼虛妄分別之相。無如是相即彼無體相,無體相法無我,真如清淨觀相是第一義。是故,如來依第一義說彼諸法名無體相。

「世尊!如一色陰,餘陰亦如是;如是,十二入、十八界,一一入、一切法亦如是。

「世尊!我知如來所說法義:所謂分別境界中虛妄分別有為行相, 所謂苦諦,知苦諦依於名字,說自體相勝相虛妄分別,如來依彼說 言諸法無有體相。世尊!彼分別境界相依止分別有為行相,名因緣 相。世尊!是故,我說我知如來所說法義。何以故?世尊!即彼分 別境界分別諸相依止虛妄行相而生,而彼虛妄分別行相無如是體、 無如是相,是法無我,真如清淨觀名第一義。是故,如來依彼法說 第一義無體相。

「世尊!如苦諦,餘諦亦如是;如是,四念處、四正勤、四如意 足、五根、五力、七覺分、八聖道,以要言之,一切諸法亦復如 是。

「世尊!我知世尊所說法義:於分別境界中依虛妄分別有為行相, 正覺三昧對治,對治生正三昧;生三昧已而復住持,不忘、不失, 修行增長。名字所說法相、勝相是分別相,是故,如來依彼法相說 言諸法無有體相。世尊!彼分別境界依止他力、因緣行相是他力 相,是故,如來依彼法相說言諸法無有體相,亦說第一義是無體 相。

「世尊!我知世尊所說義相:即彼名字分別境界依止分別名字行相,即彼分別無如是相,即彼無相、即彼無相體、無體法、無我,

真如清淨觀相即第一義。是故,世尊說言諸法無有體相是第一義相。

「世尊!譬如毘舒婆藥草著諸藥中、一切食中。世尊!如來說法亦 復如是,諸法無體相一一諸法不生、諸法不滅、諸法寂靜、諸法自 性涅槃——說了義修多羅,置於一切不了義修多羅中。

「世尊!譬如畫地,種種一相,所謂青、黃、赤、白,能了別彼種種畫相。世尊!如來說法亦復如是,諸法無體相——不生、不滅、寂靜、自性涅槃——了義言教置於一切不了義中成一味相,亦能了別彼不了義修多羅等名字故。

「世尊!譬如一切諸飲食中,若置熟酥生增上味。佛說此法亦復如 是,依一切法無有體相——不生、不滅、寂靜、自性涅槃——說此 了義修多羅,置諸一切不了義中能生增上歡喜踊躍。

「世尊!譬如虚空,一切處等於諸一切種種作業無有障礙,皆悉能成。世尊!如來亦爾,說言諸法無有體相——諸法不生、諸法不滅、諸法寂靜、諸法自性而是涅槃——說了義經於諸一切不了義經等同一味,成就一切聲聞、辟支佛、大乘修行,作無障礙。」

爾時,世尊告成就第一義菩薩言:「善哉,成就第一義!」復作是言:「善哉,善哉!成就第一義!汝實能知諸佛如來說法之意。汝今善說此義譬喻,如彼毘舒婆藥草、畫地、置酥、虛空等譬。成就第一義!如是如是,如汝所說。不異汝說,如是受持。」

爾時,成就第一義菩薩白佛言:「世尊!如來初成應、正等覺,於 波羅 標城仙人集處、諸禽獸遊處,為諸修行聲聞行人一轉四諦希有 法輪,世間一切沙門、婆羅門、天、人、魔、梵無能轉者,若有能轉,依法相應無有是處。

「世尊!此第二轉法輪說上法相可入法相,分別彼諸不了義修多羅,為住大乘眾生說於諸法無有體相——諸法不生、諸法不滅、諸法寂靜、諸法自性涅槃——希有之中復是希有。

「世尊!此是第三轉法輪,為住一切大乘眾生說諸法無體相一一不生、不滅、寂靜、自性涅槃——善說四諦差別之相,希中希有,無人能入、無人能對、無人能諍、更無有上、更無有勝了義修多羅無諍論處。」

爾時,成就第一義菩薩白佛言:「世尊!若善男子、善女人聞如來說諸法本來無體相一一本來不生、本來不滅、本來寂靜、本來自性涅槃一一正信書寫、寫已受持、供養、施與他人、為自說、自誦、自讀、修行隨喜,彼善男子、善女人得幾所功德?」

爾時,世尊告成就第一義菩薩摩訶薩言:「彼善男子、善女人成就無量阿僧祇功德聚。成就第一義!彼之功德無有譬喻可以況說。以要言之,略說少分。成就第一義!譬如指甲上土,依大地土百分不及一、迦羅分不及一、憂波尼沙陀分不及一,乃至算數譬喻不能及一。成就第一義!譬如牛跡中水,依大海水百分不及一、千分不及一、迦羅分不及一、憂波尼沙陀分不及一,乃至算數譬喻亦不及一。

「成就第一義!如是,我說信不了義修多羅,乃至修行不了義修多羅所得功德,依此所說了義修多羅,生於信心乃至修行所得功德、受持讀誦,彼不了義修多羅,百分不及一、千分不及一、萬分不及一、迦羅分不及一、憂波尼沙陀分不及一,乃至算數譬喻所不能知。」

爾時,成就第一義菩薩白佛言:「世尊!此深密解脫修多羅中,此法門名為何等?云何奉持?」

佛言:「成就第一義!此法門名『說第一義了義修多羅』,汝應如 是受持。」

佛說此法門時,六千眾生發阿耨多羅三藐三菩提心、三百千聲聞遠 塵離垢得法眼淨、復有五百千聲聞得無漏心解脫、七萬五千菩薩得 無生法忍。

深密解脫經卷第二

深密解脫經卷第三

元魏天竺三藏菩提流支譯

聖者彌勒菩薩問品第九

爾時,聖者彌勒菩薩摩訶薩,依奢摩他毘婆舍那所攝法相,白佛言:「世尊!世尊!菩薩依止何法、住持何法,於大乘中修行奢摩他、毘婆舍那?」

佛告彌勒菩薩言:「彌勒!依說諸法差別之相及能住持阿耨多羅三藐三菩提心。彌勒!如我所說四種觀法,菩薩依彼四種觀法修行大乘奢摩他、毘婆舍那。何等為四?一者、分別觀,二者、無分別觀,三者、事別,四者、所作成就。」

彌勒菩薩問佛言:「世尊!有幾種奢摩他觀?」

佛言:「彌勒!惟有一種奢摩他觀,所謂無分別觀。」

彌勒菩薩復言:「世尊!可有幾種毘婆舍那觀?」

佛言:「彌勒!惟有一種,所謂差別觀。」

彌勒菩薩復言:「世尊!有幾數名向二觀?」

佛言:「彌勒!有於二種:一者、事別,二者、事成就。」

彌勒菩薩言:「世尊!云何菩薩依四種法修行奢摩他、毘婆舍那 觀,善知奢摩他、毘婆舍那?」

佛言:「彌勒!如我為諸菩薩所說差別法相,所謂修多羅、祇夜、 和伽羅、那伽他、憂陀那、尼陀那、阿婆陀那、伊帝憂多伽、闍多 伽、毘佛略、阿浮陀檀摩、憂波提舍。彌勒!一切菩薩於如是等修 多羅中,應善諦聽、口常善誦、心常善知、智常善觀、慧如實覺。 彌勒!諸菩薩等於彼修多羅中善思惟已,於空閑處獨坐觀察,觀察 彼心,內常隨順。如是觀心、如是不斷心,彼菩薩得身樂、心樂。 彌勒!是名我說菩薩修行奢摩他法。

「彼菩薩得身心樂已,依身心樂觀所說法,如向思惟一切諸法,觀察內心三昧境界像,能信諸法,離於思惟。彌勒!諸菩薩等如是觀彼三昧鏡像可知彼義,覺觀思惟,忍悕見意知覺現前。彌勒!是名我說菩薩修行毘婆舍那。彌勒!諸菩薩等應當如是善知毘婆舍那。」

爾時,聖者彌勒菩薩白佛言:「世尊!世尊!菩薩未得內心觀像,未得身樂、未得心樂,佛說彼觀名何等觀?」

佛言:「彌勒!非奢摩他,是隨順奢摩他,是故,我說名為隨順信奢摩他。」

彌勒菩薩言:「世尊!菩薩未得身樂、心樂,觀於內身三昧境界, 思惟彼法,如是觀心,佛說彼觀名何等觀?」

佛言:「彌勒!我說彼觀非毘婆舍那,名隨順信毘婆舍那。」

彌勒菩薩言:「世尊!說奢摩他行、毘婆舍那行,為一、為異?」

佛言:「我說非異、非不異。彌勒!以何義故我說不異?毘婆舍那觀不離奢摩他,是故不異。彌勒!以何義故我說是異?以觀分別境像差別,是故為異。」

彌勒菩薩言:「世尊!毘婆舍那三昧境界,為異彼心、不異彼心?」

佛言:「彌勒!我說不異。何義不異?以唯是心觀彼境像。何以故?我說但是心意識觀得名故。」

彌勒菩薩言:「世尊!若彼心境像不異於心,云何心即能觀於心?」

佛言:「彌勒!彼處無有一法能觀一法,而彼心生如是現見。彌勒!譬如清淨明鏡,依因境像能見境像,而不作心:『我見境像。』依彼境像現見境像。彌勒!如彼心生不離於心,離心見境,彼三昧鏡像現見境界。」

彌勒菩薩言:「世尊!一切眾生所有心法、色等境界,為異於心、 為不異心?」

佛言:「彌勒!不異於心。而諸凡夫顛倒智取,不能識知但是心法,以不如實知彼種種境像,顛倒取顛倒法。」

彌勒菩薩言:「世尊!云何菩薩一向修行毘婆舍那?」

佛言:「彌勒!若菩薩隨順觀彼心相不斷,如是菩薩一向修行毘婆舍那。」

彌勒菩薩言:「世尊!云何菩薩一向觀彼奢摩他法?」

佛言:「彌勒!若菩薩隨順觀彼心相不斷,如是,菩薩一向觀彼奢 摩他法。」

彌勒菩薩言:「世尊!云何菩薩奢摩他、毘婆舍那二法和合,一時 修行?」

佛言:「彌勒!若菩薩觀心一心,如是,奢摩他、毘婆舍那一時修 行。」 彌勒菩薩言:「世尊!何者是心相?」

佛言:「彌勒!所謂分別三昧境界鏡像觀毘婆舍那,是名心相。」

彌勒菩薩言:「世尊!何者是心無間?」

佛言:「彌勒!謂觀像心奢摩他觀,是名心無間。」

彌勒菩薩言:「世尊!何者是心而言一心?」

佛言:「彌勒!所謂觀彼三昧境像覺知是心,覺知是心已修真如觀,彌勒!是名一心。」

彌勒菩薩言:「世尊!毘婆舍那行有幾種?」

佛言:「彌勒!毘婆舍那有於三種。何等三種?一者、相,二者、修行,三者、觀。彌勒!何者是相毘婆舍那?所謂但觀三昧境界分別境像,是名相毘婆舍那。彌勒!何者是修行毘婆舍那?所謂智慧善見彼彼法相,是名修行毘婆舍那。彌勒!何者是觀毘婆舍那?所謂彼波法中智慧善觀彼彼法相而不證彼寂滅解脫,彌勒!是名善觀察修行毘婆舍那。」

彌勒菩薩復言:「世尊!奢摩他行有幾種?」

佛言:「彌勒!依前法,後三種亦如是應知。復次,彌勒!奢摩他 有八種:所謂初禪奢摩他,如是,二禪、三禪、四禪、無邊空處、 無邊識處、見少處、非想非非想處。復次,彌勒!有四種奢摩他: 謂慈奢摩他、悲奢摩他、喜奢摩他、捨奢摩他。」

彌勒菩薩言:「世尊!如世尊說,依止奢摩他、毘婆舍那,不依止 奢摩他、毘婆舍那。世尊!何者是依止法?何者是不依止法?」 佛言:「彌勒!如所聞法隨順法相,彌勒!是名依止法奢摩他、毘婆舍那。彌勒!離所聞法,思惟取法,依他教觀奢摩他、毘婆舍那義一一所謂觀彼諸相青、黃、赤、白、臭、爛,一切有行無常苦、一切法無我、一切法寂靜、一切法涅槃——如是等奢摩他、毘婆舍那,彌勒!是名不依止法奢摩他、毘婆舍那應知。彌勒!所謂依止法奢摩他、毘婆舍那,而我為彼隨順法相利根菩薩作如是說。彌勒!不依止法隨順他教,而我為彼軟根菩薩作如是說。」

彌勒菩薩言:「世尊!如世尊說,差別觀奢摩他、毘婆舍那法,不 差別觀奢摩他、毘婆舍那法。世尊!何者是差別觀奢摩他、毘婆舍 那法?何者不差別觀奢摩他、毘婆舍那法?」

佛言:「彌勒!若菩薩一一觀修多羅等法,如聞、如取,思惟諸法,修行奢摩他、毘婆舍那,是名差別觀奢摩他、毘婆舍那法。彌勒!若菩薩即彼修多羅等法,作一段、一分、一聚,如是思惟此一切法,隨順真如、流順真如、隨向真如、隨順彼真如、隨順菩提、隨順涅槃、隨心識轉、隨順彼法、隨向彼法,如實能知無量阿僧祇諸善法相,彌勒!是名無差別觀奢摩他、毘婆舍那法。」

彌勒菩薩言:「世尊!如世尊說,少相差別觀奢摩他、毘婆舍那法,大相差別觀奢摩他、毘婆舍那法。世尊!何者是少相差別觀奢摩他、毘婆舍那法?何者是大相差別觀奢摩他、毘婆舍那法?何者是無量相差別觀奢摩他、毘婆舍那法?」

佛言:「彌勒!若菩薩差別觀修多羅一一乃至憂波提舍作一段思惟,彌勒!是名少相差別觀奢摩他、毘婆舍那法。彌勒!若菩薩即彼修多羅等不差別作一段思惟,彌勒!是名大相差別觀奢摩他、毘婆舍那法。彌勒!若菩薩諸佛如來說無量法、無量名字、無量章句、無量上上智慧、樂說、辯才作一段思惟,是名無量差別觀奢摩他、毘婆舍那法。」

彌勒菩薩言:「世尊!云何菩薩證得差別觀奢摩他、毘婆舍那法?」

佛言:「彌勒!有五種觀觀彼法。何等五種?所謂思惟奢摩他、毘婆舍那,念念滅一切煩惱;身離種種相,得法樂樂;如實知十方無量無畔齊;知無量法光明所作成就相應清淨分;無分別相現前,為得成就法身證上上勝勝因。」

彌勒菩薩言:「世尊!何處隨順修行差別觀奢摩他、毘婆舍那法? 何處證得差別觀奢摩他、毘婆舍那法?」

佛言:「彌勒!初歡喜地菩薩摩訶薩隨順證少,於第三光明地菩薩 善證得應知。彌勒!初學菩薩亦修行此差別觀奢摩他、毘婆舍那 法,學思惟不休息故。」

彌勒菩薩言:「世尊!何者奢摩他、毘婆舍那有覺有觀三昧?何者 是無覺有觀三昧?何者是無覺無觀三昧?」

佛言:「彌勒!若菩薩隨如所聞攝受諸法,於一切法覺觀相麁細, 隨順能生奢摩他、毘婆舍那法,是名有覺有觀三昧。彌勒!若菩薩 於彼法相不了了麁細相,隨順彼法修行而得彼法光明正念心,隨順 細觀察奢摩他、毘婆舍那,彌勒!是名無覺有觀三昧。彌勒!若菩 薩離一切相,自然隨順法,思惟觀察奢摩他、毘婆舍那,是名無覺 無觀三昧。

「復次,彌勒!初修行奢摩他、毘婆舍那,是名有覺有觀三昧。彌勒!若菩薩觀一切法,是名無覺少觀三昧。彌勒!若菩薩觀無差別法三昧,是名無覺無觀三昧。」

彌勒菩薩言:「世尊!何者是奢摩他相?何者是取奢摩他相?何者是奢摩他捨相?」

佛言:「彌勒!若菩薩掉動心、疑心中,生驚畏心或欲遠離,思惟 諸法而不斷絕,是名奢摩他相。彌勒!若菩薩心沈沒沈沒相疑,思 惟於法生歡喜心,是名取相奢摩他。彌勒!若菩薩一向於奢摩他 道、一向毘婆舍那道,雙道觀彼二法,煩惱不染於心,自然思惟、 自然隨順彼法修行,是名奢摩他捨相。」

彌勒菩薩言:「世尊!如世尊說,菩薩修行奢摩他、毘婆舍那法,如實知法、如實知義。世尊!云何菩薩知法、知義?」

佛言:「彌勒!若菩薩知五種觀法,名如實知法。何等為五?一者、名,二者、句,三者、字,四者、差別,五者、同。彌勒!何者是名?謂於染法、淨法中觀自體相、說法相,彌勒!是名為名。彌勒!何者是句?即彼法種種名名,聚染法、淨法義為名,用依止、住持,是名為句。彌勒!何者是字?即彼名句依彼一法名,是名為字。彌勒!何者是差別?謂一一法別異觀,是名差別。彌勒!何者是同?所謂無差別觀法,說名為同。彌勒!若菩薩如是觀者,名為如實知法。

「彌勒!云何菩薩觀義?菩薩觀義有十種。何等為十?一者、所應修行者修行,二者、修行至究竟處,三者、知能取義,四者、知可取義,五者、知住持義,六者、知受用義,七者、知顛倒義,八者、知不顛倒義,九者、知染義,十者、知淨義。

「彌勒!若菩薩染、淨法中一切種差別修行——謂陰五種數、內入 六種數、外入六種數——如是等差別修行,彌勒!是名菩薩所應修 行者修行。

「彌勒!若菩薩於染、淨法中如實知真如,彌勒!是名菩薩修行至 究竟處。

「復次,彌勒!真如有七種。何等為七?所謂無始有為行相真如; 相真如,所謂我空、法空;唯識真如,知有為行惟是心;執著真 如,所謂我說苦諦;邪行真如,所謂我說集諦;清淨真如,所謂我 說滅諦;正修行真如,所謂我說道諦。彌勒!行相真如、執著真 如、邪行真如,此三真如一切眾生平等無差別。彌勒!相真如、唯 識真如,此二真如一切法平等無差別。彌勒!清淨真如,聲聞、緣 覺、菩薩、阿耨多羅三藐三菩提平等無差別。彌勒!修行真如,如 聞妙法,差別觀奢摩他、毘婆舍那,攝取般若平等無差別。

「彌勒!菩薩知能取義者,所謂五種入相及心意意識心數法,是名知能取義。

「彌勒!可取義者,所謂外六入。彌勒!能取義者即是可取義,是 名知能取可取義。

「彌勒!菩薩知住持義者,所謂世界眾生住處,依彼住處眾生可見,所謂聚落、田地。彼百聚落地、彼千聚落地、彼千萬聚落地,名盡海畔地;彼百千,彼百千閻浮提;彼百千、彼百千萬,名為一千世界;彼一千世界百倍、彼百倍千倍、彼千倍百千倍,名為二千中世界;彼二千中世界百倍、千倍、百千倍,名為三千大千世界;彼三千大千世界百倍、彼復千倍、復千倍、復百千萬倍、彼百千萬倍,名為一億;彼一億百倍、彼百倍復千倍、彼千倍復一億、彼一億復千億、復百千億,名為一阿僧祇;彼百億千億、彼千億百千億、彼百千億阿僧祇、彼阿僧祇百阿僧祇、彼百阿僧祇千阿僧祇、彼百千月僧祇百千萬三千大千、百千萬阿僧祇世界、百千萬微塵數,十方世界無量世界,彌勒!是名菩薩知住持義。

「彌勒!何者菩薩知資生義?所謂我為眾生說種種資生所受用故。

「彌勒!何者是菩薩知顛倒義?彌勒!即彼取受用於無常義中生常相顛倒、心相顛倒、見相顛倒,於苦中生樂相顛倒、不淨中生淨相 顛倒,於無我中生我相顛倒、心相顛倒、見相顛倒,彌勒!是名菩 薩知顛倒義。

「彌勒!何者是菩薩知非顛倒義?彌勒!即遠離彼四顛倒,是名菩薩知非顛倒義。

「彌勒!何者是菩薩知染相義?彌勒!於三界中有三種染相:所謂煩惱染、業染、生染。彌勒!是名菩薩知染義。

「彌勒!云何菩薩知淨義?彌勒!即遠離彼三種染,修行菩提分法,彌勒!是名菩薩知淨義。

「彌勒!此十種義攝取一切義應知,彌勒!是名菩薩如實知義相。

「復次,彌勒!若菩薩知五種法,彼菩薩名善知義。何等為五?一者、可知境界,二者、可知義,三者、知法,四者、依知得證果, 五者、如實受彼法。

「彌勒!何者是可知法?彌勒!一切境界——所謂五陰、內諸入、 外諸入等——是名知境界。

「彌勒!何者是可知義?彌勒!無量種觀如實知彼法——所謂世諦、第一義諦,功德法、過咎法,因緣法、三世法,生法、住法、滅法、病等諸法,苦、集等法,真如法、實際法、法界法,略法、廣法,一向差別說問答法、置答法,祕密法、直說法——彌勒!如是等可知義應知。彌勒!何者是知法?彌勒!能生彼知三十七品——所謂四念處乃至八聖道——彌勒!是名知法。

「彌勒!何者是菩薩依知得證法?所謂滅貪、瞋、癡煩惱,遠離貪、瞋、癡煩惱,得四沙門果——所謂我說聲聞、如來、世間、出

世間一切功德——彼諸功德如實證知,彌勒!是名菩薩依知證果法。

「彌勒!何者是菩薩如實受彼法?彌勒!即彼所證法知解脫、受解脫,復為一切眾生廣說、示現開發。

「彌勒!此五法攝取一切義應知。

「復次,彌勒!菩薩知四種觀,名如實知義。何等為四?所謂知心生義、知受用義、知隨心義、知染淨義。

「彌勒!菩薩畢竟得四種義,亦名攝取一切義應知。

「復次,菩薩如實知三種法名為如實知義。何等為三?所謂字義、義義、界義。彌勒!何者字義?所謂名、身等應知,彌勒!是名字義。彌勒!何者義義?彌勒!義義有十種。何等為十?所謂實相;知相;遠離相;證相;修行相,即彼實相等;種種差別相;依止所依止相應相,即彼知相等障礙相;隨順法相、不知過咎相、知利益相。彌勒!是名菩薩知義義相。

「彌勒!何者是菩薩知界義相?彌勒!界義相有五種:所謂世界、 眾生界、法界、可化界、可化方便界。彌勒!此五種界攝取一切義 應知。」

爾時,彌勒菩薩白佛言:「世尊!所言聞慧、思慧、奢摩他、毘婆舍那,三種修行義。此三種慧,云何差別?」

佛言:「彌勒!聞慧修行者,依止名字,如聞不稱意,非現前解 脫、隨順解脫,彌勒!是名聞慧修行義。彌勒!思慧修行義者,彌 勒!思慧亦依名字,唯如聞,不如是隨順心,非現前解脫,而轉轉 隨順解脫,非現證解脫,彌勒!是名思慧修行義。彌勒!修慧修行 義者,彌勒!菩薩依名字、不依名字,依如聞、不依如聞,隨順 心、隨智可知法,三昧境界像現前,轉轉隨順解脫、增長解脫,彌勒!是名修慧修行義。彌勒!是名三慧異相義。」

彌勒菩薩言:「世尊!菩薩修行奢摩他、毘婆舍那,何等為智?何 等為見?」

佛言:「彌勒!我應說彼無量智見相。以略言之,於差別法相中奢 摩他、毘婆舍那般若,是名為智。彌勒!觀諸法無差別相,是名為 見。」

彌勒菩薩言:「世尊!菩薩修行奢摩他、毘婆舍那,以何等心觀何 法相?」

佛言:「彌勒!真如觀心,修行法相、義相,亦不見名,亦不見名 體相,亦不見彼名字因相。如是,句、字一切義應知,乃至不見十 八界自體相,亦見彼因相,修行奢摩他毘婆舍那。是名修行奢摩他 毘婆舍那義應知。」

彌勒菩薩言:「世尊!菩薩修行真如義相亦修行彼相不?」

佛言:「彌勒!真如形相無相可見。若無相者,云何修行?彌勒!菩薩修行真如相者,降伏一切法、一切義相,而彼諸法不能降伏真如義相。」

彌勒菩薩言:「世尊!世尊常說器不清淨、鏡不清淨、諸水等濁不 見面相,清淨器等能見面相。如是,世尊!不修行如實心者,不能 見諸一切法相,修行者見。世尊!依何等心觀何等真如觀,說如是 義?」

佛言:「彌勒!我依三種觀說如是義。何等為三?所謂聞慧、思慧、修慧,三種觀心能識真如。彌勒!我依如是義說。」

彌勒菩薩言:「世尊!菩薩如是解諸法義、修行諸法相,幾法相難 修行?以何等法、何等觀觀彼難修行?」

佛言:「彌勒!有十種難修行相,依十八空觀彼難修行相。何等為十?彌勒!觀法義相、種種名字相,依一切法空,斷彼難修行相。

「彌勒!取如實義相受用——所謂生相、滅相、住相、異相、相應 行相——依相空、無始空,斷彼難修行相。

「彌勒!取能取義相——所謂依身相、依我相——依內空、依不見空,斷彼難修行相。

「彌勒!取可取相——所謂資生相——依外空,斷彼難修行相。

「彌勒!取受用義男女相種種資生——所謂內外清淨相——依內外空、自性空,斷彼難修行相。

「彌勒!取住持義有無量相,依大空,斷彼難修行相。

「彌勒!取無色修行相、內寂靜解脫相,依有為空,斷彼難修行相。

「彌勒!取真如相義——所謂我空、法空,唯是心第一義相——依本空、無物空、自體空、無體自體空、第一義空,斷彼難修行相。

「彌勒!取清淨真如無為相、義離諸相、無異相,依無為空、不異空,斷彼難修行相。

「彌勒!取彼無為空、無異空,為斷彼空相,對治無為空、無異空,依空空,斷彼二空。」

彌勒菩薩言:「世尊!菩薩如是修行十種相,於何等縛相而得解 脫?」 佛言:「彌勒!修行三昧境界見形像相染縛煩惱中而得解脫,即觀 彼鏡像不取境界相,是名斷彼難修行相。彌勒當知,差別而言,是 諸空等對十種相,非一一空不能對治斷十種相。彌勒!譬如無明不 能生生,乃至老、死染煩惱等,但依本言無明緣行生,依近因緣故 如是說。彌勒!此義如是應知。」

彌勒菩薩言:「世尊!何者是略空相?菩薩知彼略空相不失一切空相,離諸一切憍慢空相。」

爾時,世尊告彌勒菩薩言:「善哉,彌勒!善哉,善哉!彌勒!汝今乃能問佛此義。彌勒!汝能為於諸菩薩等不失空相故如是問,善哉是問。何以故?彌勒!若菩薩不知空相則失一切大乘法相。彌勒!汝今諦聽,我為汝說略相空義。彌勒!於他力相、第一義相、一切法中無染淨相,彼虛妄分別相常離彼相,不見有相,是名大乘中說略相空。」

彌勒菩薩言:「世尊!奢摩他、毘婆舍那攝幾種三昧?」

佛言:「彌勒!我說種種三昧——所謂聲聞、菩薩、如來三昧—— 攝取彼諸一切三昧應知。」

彌勒菩薩言:「世尊!奢摩他、毘婆舍那能成何等法因?」

佛言:「彌勒!能成清淨戒因,能成聞慧、思慧見因。」

彌勒菩薩言:「世尊!彼清淨戒、聞、思慧因成何等果?」

佛言:「彌勒!能成心清淨果、智慧清淨果。復次,彌勒!能成一切世間、出世間善法,一切聲聞、菩薩、諸佛奢摩他、毘婆舍那果 應知。」

彌勒菩薩言:「世尊!奢摩他、毘婆舍那作何等業?」

佛言:「彌勒!遠離二種縛。何者為二?所謂遠離相縛、遠離煩惱 縛。彌勒!是名奢摩他、毘婆舍那業。」

彌勒菩薩言:「世尊!佛說五種障。幾種障奢摩他?幾種障毘婆舍那?幾種向二障?」

佛言:「彌勒!惜身、資生,此二種障奢摩他。彌勒!聖人所說一切善法得聞不喜,此障毘婆舍那。彌勒!喜憒閙處、得少為足,此二障奢摩他、毘婆舍那應知。彌勒!喜閙亂處不能發修行法,得少為足,不能畢竟得究竟處。」

彌勒菩薩言:「世尊!如來說五種蓋。幾是奢摩他障?幾是毘婆舍那障?幾是向二障?」

佛言:「彌勒!掉、悔是奢摩他障,睡、疑是毘婆舍那障,欲、瞋 二種是向二障。」

彌勒菩薩言:「世尊!云何善清淨奢摩他道?」

佛言:「彌勒!善伏睡眠,如是名為善能清淨奢摩他道。」

彌勒菩薩言:「世尊!云何善清淨毘婆舍那道?」

佛言:「彌勒!若能善斷掉、悔二蓋,如是則名善能清淨毘婆舍那道。」

彌勒菩薩言:「世尊!菩薩修行奢摩他、毘婆舍那行,有幾種法能 知心散亂不名相應?」

佛言:「彌勒!菩薩知五種法,所謂:正念散亂、外心散亂、內心 散亂、相散亂、煩惱散亂。 「彌勒!若菩薩捨正念大乘相應相,隨念聲聞、辟支佛相應念相,彌勒!是名菩薩正念散亂。

「彌勒!若菩薩著外五欲、樂憒閙處、著諸覺觀、隨順煩惱相念, 是名外心散亂。

「彌勒!若菩薩為睡不利、心著三昧及餘三昧三摩婆提、染於所染,彌勒!是名內心散亂。

「彌勒!若菩薩依外相、內身三昧境界相思惟,是名心散亂。

「彌勒!若菩薩依內心思惟因緣,生覺觀煩惱——如是心是我—— 彌勒!是名煩惱散亂心。」

彌勒菩薩言:「世尊!奢摩他、毘婆舍那,從初菩薩地乃至如來地,對治何等過?」

佛言:「彌勒!奢摩他、毘婆舍那於初地中對治惡道業生煩惱染; 第二地中對治微細過失;第三地中對治欲得善法過;第四地中對治 愛三摩拔提心過;第五地中對治世間涅槃一向現前、不一向現前 過;第六地中對治諸相行過;第七地中對治微細相行過;第八地中 對治無相行、自然行過;第九地中對治一切種說法不得自在過;第 十地中對治未得滿足法身過;彌勒!第十一地中對治細極細微細智 障。彌勒!菩薩斷彼一切障已,得無障礙一切智處,成就所求法, 得清淨法身。」

彌勒菩薩言:「世尊!云何菩薩修行奢摩他、毘婆舍那得阿耨多羅 三藐三菩提?」

佛言:「彌勒!菩薩修行奢摩他、毘婆舍那,依七種真如為本,如 聞思法入於定心,即念彼法,如聞、思慧,善思惟內心差別,觀彼 真如。菩薩觀彼真如之法,尚捨微細修行之心,何況麁法? 「彌勒!何者是微細修行心相?所謂生心識、受心識、染淨識, 內、外及彼二,彼行利益一切眾生,真如智一一苦、集、滅、道, 有為、無為,常、無常,苦集不異自性,業有為相,一切人無我、 法無我相一一如是等法修行捨心。彌勒!菩薩如是發心修行。如是 多修行,剎那剎那離一切蓋得清淨心,得清淨心已入七種真如,內 身證彼七種覺相應知,彌勒!是名菩薩摩訶薩善得見道。

「菩薩得彼見道智已,名定聚菩薩,生在佛家,受用初地,利益歡喜。是菩薩先已修行奢摩他、毘婆舍那道,於此始得事究竟觀;是菩薩復於上上地中修行,念彼二種觀故,離諸微細相。

「彌勒!譬如有人巧以細楔出彼麁楔。彌勒!菩薩修行亦復如是, 觀內心相,離彼一切諸染相分;離染相分已,離取一切諸善法相; 離取一切諸善法相已,離一切相。如是次第,上上地中念相似法, 內心清淨乃至證阿耨多羅三藐三菩提,得所作修行觀行成就。彌 勒!菩薩如是修行,得阿耨多羅三藐三菩提。」

深密解脫經卷第三

元魏天竺三藏菩提流支譯

彌勒菩薩問品之二

彌勒菩薩言:「世尊!云何菩薩摩訶薩修菩薩行現得菩薩諸勝妙 果?」

佛言:「彌勒!若菩薩如實能知六種法者,是人能得菩薩妙果。何 等六種?所謂善知心生、善知心住、善知心起、善知法來、善知善 法增長、善知巧方便。

「彌勒!云何菩薩善知心生?彌勒!若菩薩知十六種心生,所謂:不覺不知不動器世間識,譬如阿陀那識;取種種相觀識,譬如一時取色等可取境界,無分別意識知內外色,一念間入無量三昧、見無量佛國土、見無量諸佛;彌勒!少相觀相應識,譬如欲界相相應識;彌勒!無量相觀相應識,譬如一切虛空一切識相相應識;彌勒!細相觀相應識,譬如少相相應識;彌勒!遍相觀相應識,譬如非想非非想相應識;彌勒!極細相觀相應識,譬如出世間相相應識;彌勒!苦相觀相應識,譬如惡道識;彌勒!雜相、受相觀相應識,譬如欲界識;彌勒!喜相觀相應識,譬如卻界。這難也問問題,譬如欲界識;彌勒!喜相觀相應識,譬如卻不苦不樂相觀相應識,譬如第四禪乃至非想非非想識;彌勒!染相觀相應識,譬如染煩惱隨順煩惱識;彌勒!善計想識;彌勒!染相觀相應識,譬如染煩惱隨順煩惱識;彌勒!善計想識,譬如修行信等相應識;彌勒!無記相觀相應識,譬如遠離彼二法識。彌勒!是名菩薩知諸法生。

「彌勒!云何菩薩如實知諸法住?彌勒!若菩薩如實能知唯是識體,是名菩薩知諸法住。

「彌勒!云何菩薩善知諸法起?彌勒!若菩薩如實能知二種相煩惱縛,若知彼已,作是思惟:『應捨此法。』彌勒!菩薩如是名善知諸法起。

「彌勒!云何菩薩善知法來?彌勒!若菩薩善知彼煩惱,對治心增長,知諸法增長已,是名菩薩善知我法增長。

「彌勒!云何菩薩善知諸法下?彌勒!若菩薩知彼對治法——煩惱染相心下損——善知諸法損,彌勒!是名菩薩善知諸法下。

「彌勒!云何菩薩善知巧方便?彌勒!若菩薩觀察解脫勝處一切入,彌勒!是名菩薩善知巧方便。

「彌勒!菩薩摩訶薩善知如是修行菩薩行者能得菩薩最勝妙果。彌勒!過去一切菩薩亦如是、未來一切菩薩亦如是、現在一切菩薩亦 如是,修行菩薩行得菩薩妙果。」

彌勒菩薩言:「世尊!如來常說無餘涅槃界中一切受滅盡無餘。世尊!何者是彼受相而言一切受相滅?」

佛言:「彌勒!略說二種受滅,所謂見身受相滅、受彼果境界受相滅。

「彌勒!身受相滅者,有四種受應知。何等四種?所謂依止色受相、依止非色受相、成就果受相、不成就果受相。

「彌勒!成就果受相者,謂現前受相;不成就受果相者,謂未來世因受。

「彼果報境界受相亦有四種,所謂:住持受相、資生受相、受用受相、對受相。

「彌勒!有餘涅槃界中非成就受相果,明觸受相受,是故,依彼對一切受相未滅以有餘受相。彌勒!成就果相、受相一切種,彼二受相滅,但有明觸受相受。無餘涅槃界中,彼受亦滅,以無餘涅槃中更無明觸相。是故,我說無餘涅槃中滅一切受相。」

爾時,世尊告彌勒菩薩摩訶薩言:「善哉,善哉!彌勒!汝依如實修行故問滿足清淨菩薩行相。彌勒!汝於如實修行法中善學具足,是故問我如實行法。彌勒!我已善說菩薩滿足清淨修行法應知,彌勒!過去諸佛亦如是說、未來諸佛亦如是說、現在諸佛亦如是說, 過去、未來、現在一切諸善男子亦如是問。是故,一切諸善男子、善女人等應當至心行菩薩行。」

爾時,世尊而說偈言:

「此說法行中, 若人不放逸, 智人正思惟, 能得無上道。 欲得彼法體, 若人取法相, 彼離如實行, 空地不相應。 利眾生勇猛, 見為眾生性, 得無染著相、 一切出世善。 彼人還得法, 為求欲說法, 彼得無價寶, 乞求行世間。 解脫諸戲論, 精進行堅固, 為利益眾生, 修行此實行。」

爾時,彌勒菩薩摩訶薩白佛言:「世尊!此深密解脫經中,當何名此法門?云何奉持?」

佛言:「彌勒!此法門名為『如實修行了義修多羅』,汝當奉持。」

說是如實修行了義修多羅時,六千眾生發阿耨多羅三藐三菩提心、三千聲聞遠塵離垢得法眼淨、十萬五千聲聞離諸漏得心解脫、七萬

五千菩薩得大乘如實修行觀成就。

聖者觀世自在菩薩問品第十之一

爾時,聖者觀世自在菩薩摩訶薩白佛言:「世尊!世尊為諸菩薩說十地差別,所謂:歡喜地、離垢地、光明地、炎地、難勝地、現前地、遠行地、不動地、善慧地、法雲地、第十一佛地。世尊!有幾種清淨?攝此諸地有幾種分?」

佛言:「觀世自在!有四種清淨、十一分攝此諸地應知。觀世自在!增上清淨攝初地、增上戒清淨攝二地、增上心清淨攝三地、增上 上慧清淨攝四地乃至上上勝妙從四地乃至佛地。觀世自在!是名四種清淨攝諸地應知。

「觀世自在!何者十一分攝諸地義?觀世自在!從菩薩起信行地修 行十種信心,能善思惟菩薩乘,彼信行地行過彼信地,入於定聚滿 足彼分。觀世自在!彼諸菩薩雖滿彼分,於微細行中而猶不能如實 修行;彼諸菩薩不滿彼分,為滿足故修行進求得滿彼分,雖滿彼分 而猶不能如實滿足世間三昧三摩跋提及未滿足聞持陀羅尼;彼諸菩 薩不滿彼分,為滿足故修行進求得滿彼分,雖滿彼分如菩提分而猶 不能如實修行,心不能捨三昧愛法;彼諸菩薩不滿彼分,為滿足故 修行淮求得滿彼分,雖滿彼分而猶不能如實觀察一切諸諦,亦不能 捨方便所攝修菩提分,世間涅槃—向現前、—向不現前;彼諸菩薩 不滿彼分,為滿足故修行進求得滿彼分,雖滿彼分而猶不能如實知 諸世間生死、現見修行及無相正念,不能多修;彼諸菩薩不滿彼 分,為滿足故修行進求得滿彼分,雖滿彼分而猶不能如實而知,無 間不斷無相正念,不能多修;彼諸菩薩不滿彼分,為滿足故修行進 求得滿彼分,雖滿彼分而猶不能捨無相行自然而行,無相行中不得 自在;彼諸菩薩彼分不滿,為滿足故修行進求得滿彼分,雖滿彼分 而猶不能於彼種種名字諸相無礙而說一切諸法及不能得說法自在;

彼諸菩薩不滿彼分,為滿足故修行進求得滿彼分,雖滿彼分而不能 得滿足法身及不能得受樂法身;彼諸菩薩不滿彼分,為滿足故修行 進求得滿彼分,雖滿彼分而不能得於諸一切境界相中無障無礙智慧 具足;彼諸菩薩不滿彼分,為滿足故修行進求得滿彼分,得滿彼分 已,名為滿足一切菩提分,得滿菩提,菩薩名之為佛。觀世自在! 如是十一種分攝諸地應知。」

觀世自在菩薩白佛言:「世尊!世尊何故說初名歡喜地乃至佛地說名佛地?」

佛言:「觀世自在!菩薩初離生死,得出世間大利,清淨勝妙,歡喜踊躍,是故,初地名歡喜地;遠離一切微細破戒障故,是故,第二名離垢地;依無量智光明照曜,照諸三昧及聞持陀羅尼而得自在,能作光明,是故,第三名光明地;智火炎熾,燒菩提分煩惱習垢,是故,第四名為炎地;即彼菩提分方便修行,難勝得勝,是故,第五名難勝地;正念思惟諸有為行,現前證知諸法無相,是故,第六名現前地;無間無斷無相正念,遠入行,近清淨地,是故,第七名遠行地;無有諸相,自然修行,相不能動,是故,第八名不動地;說一切法、一切種智無礙自在,得廣大智,他不降伏,是故,第九名善慧地;眾生煩惱、過患之身如虛空等,如來法身猶如大雲,覆眾生界說法示現,是故,第十名法雲地;離一切無明微細習氣、離一切境界智障習氣,無障無礙,於一切法中而得自在,是故,第十一名為佛地。」

觀世自在菩薩白佛言:「世尊!世尊!此諸地有幾種無明?幾種障對?」

佛言:「觀世自在!有二十二種無明、十一種障。

「觀世自在!於初地中執著人我法我無明、惡道煩惱染相無明,逃沒彼二是故名障;於二地中,微細過無明、種種業道無明,迷沒彼二是故名障;於四地中,愛三摩跋提無明、愛法無明,迷沒彼二是故名障;於五地中,於世間正念思惟非一向背世間非一向現世間無明、於涅槃正念思惟非一向背涅槃非一向趣涅槃無明,迷沒彼二是故名障;於六地中,不如實知有為行現前無明、多集諸相無明,迷沒彼二是故名障;於七地中,微細相行無明、一向思惟方便無明,迷沒彼二是故名障;於八地中,無自然無相無明、諸相不得自在無明,迷沒彼二是故名障;於九地中,無量說法無量名句上上樂說智慧陀羅尼無明、樂說辯才自在無明,迷沒彼二是故名障;於十地中大通無明、人微細密無明,迷沒彼二是故名障;於佛地中,於一切境界極微細無明、他障無明,迷沒彼二是故名障。

「觀世自在!是名二十二種無明、十一種障說諸地差別。觀世自在!而阿耨多羅三藐三菩提,此諸法不相應。」

觀世自在菩薩言:「希有,世尊!阿耨多羅三藐三菩提大利大果, 彼諸菩薩破大無明迷沒羅網、亦滅一切虛妄對稠林,得阿耨多羅三 藐三菩提。」

觀世自在菩薩白佛言:「世尊!世尊!說此諸地有幾種殊勝?」

佛言:「觀世自在!有八種清淨,所謂:直心清淨、慈清淨、悲清 淨、波羅蜜清淨、見諸佛供養清淨、教化眾生清淨、生清淨、力清 淨。

「觀世自在!於初地中直心清淨乃至力清淨,復有上上地乃至佛地 直心清淨、力清淨,彼清淨、極清淨、增上清淨應知。

「觀世自在!除佛地生清淨,所謂初地諸功德——彼諸地功德乃至上上地——彼初地功德平等無差別,而地地有勝功德應知。」

觀世自在菩薩白佛言:「世尊!世尊何故說一切諸生中菩薩摩訶薩 生為最勝?」

佛言:「觀世自在!有四種法,所謂:善集諸善根清淨故、得內心 方便故、起大慈悲救護一切諸眾生故、自無染故,能令一切眾生無 染。」

觀世自在菩薩白佛言:「世尊!世尊何故說諸菩薩能發一切妙願、 勝願、殊勝力願?」

佛言:「觀世自在!有四種法菩薩能如實知涅槃妙樂故,速得阿耨多羅三藐三菩提、復能捨彼速得菩提勝妙樂行、不為報恩而發大心為利眾生、於六道中長夜受諸種種苦惱。觀世自在!是故,我說諸菩薩摩訶薩妙願、勝願、殊勝力願。」

觀世自在菩薩白佛言:「世尊!世尊!菩薩摩訶薩有幾種學事?」

佛告觀世自在菩薩言:「觀世自在!菩薩學事有六種。何等為六? 所謂檀波羅蜜、尸羅波羅蜜、羼提波羅蜜、毘梨耶波羅蜜、禪波羅 蜜、般若波羅蜜。」

觀世自在菩薩白佛言:「世尊!此六種學,幾增上戒學?幾增上心學?幾增上慧學?」

佛言:「觀世自在!初三學——檀波羅蜜、尸羅波羅蜜、羼提波羅 蜜——增上戒學,禪波羅蜜增上心學,般若波羅蜜增上慧學,毘梨 耶波羅蜜遍諸波羅蜜。觀世自在!三種增上攝六種學事應知。」 觀世自在菩薩白佛言:「世尊!此六種修行,幾功德莊嚴?幾智慧 莊嚴?」

佛言:「觀世自在!增上戒學功德莊嚴,增上慧學智慧莊嚴,精進 波羅蜜、禪波羅蜜遍諸波羅蜜應知。」

觀世自在菩薩白佛言:「世尊!世尊!菩薩云何學此諸學?」

佛言:「觀世自在!有五種觀法學此諸學。何等為五?所謂依諸波羅蜜說法、依菩薩藏初至心信,次有十種法行,如實修行聞、思、修慧智故;護諸菩提心故;親近善知識故;不休息,修行一切諸善根故。觀世自在!是名菩薩學諸學事應知。」

觀世自在菩薩白佛言:「世尊!世尊!此諸學事何故說六種數?」

佛言:「觀世自在!有二種義。何等為二?所謂攝取一切眾生故、 對治諸障故。觀世自在!三種學攝取眾生利益故、三種學對治諸障 故。

「觀世自在!菩薩修行檀波羅蜜,資生利益攝取眾生;菩薩修行尸 波羅蜜,不惱、不害,以無畏施攝取眾生;菩薩修行羼提波羅蜜, 無報怨心攝取眾生。觀世自在!以此三學攝取眾生。

「觀世自在!菩薩修行毘梨耶波羅蜜,動諸煩惱、殺害諸使,修行分中不為一切煩惱所動;菩薩修行禪波羅蜜,縛諸煩惱;菩薩修行般若波羅蜜,斷一切使。觀世自在!是三種波羅蜜對治所治煩惱故。」

觀世自在菩薩白佛:「世尊!世尊何故說餘四波羅蜜但有四數?」

佛言:「觀世自在!為成就彼六波羅蜜伴故,說餘四波羅蜜。觀世自在!菩薩三波羅蜜攝取眾生、攝事方便、攝取眾生置善法中。是

故,我說方便波羅蜜與三波羅蜜為伴。

「觀世自在!菩薩現身依多煩惱而亂其心,不能修行如實之法,而復信樂少行少法,微薄直心,不能攝取內心正定,聞菩薩藏如聞而觀,不能入定,而不能起出世間智,但修少分功德智慧莊嚴之相;依彼少分智慧莊嚴為薄未來煩惱作願,是菩薩願波羅蜜。願未來世諸煩惱薄,能成精進波羅蜜。是故,我說願波羅蜜與毘梨耶波羅蜜為伴。

「觀世自在!菩薩親近善知識故聽聞正法,如實思惟而能隨順,如 實修行轉彼薄心、增長善力,於彼真如法界之中得增上力,是菩薩 力波羅蜜得內心定。是故,我說力波羅蜜與禪波羅蜜為伴。

「觀世自在!菩薩依於菩薩藏故聞慧正觀、修禪波羅蜜,是菩薩智波羅蜜,依智波羅蜜能生出世般若波羅蜜。是故,我說智波羅蜜與般若波羅蜜為伴。」

觀世自在菩薩白佛言:「世尊!世尊何故說六波羅蜜如是次第?」

佛言:「觀世自在!依前後上上轉勝故。觀世自在!菩薩遠離受用欲心,受持淨戒;受持淨戒已,能忍諸惡;能忍諸惡已,能成精進;能成精進已,能入諸禪;能入諸禪已,能得出世間智慧。觀世自在!是故,我說六波羅蜜如是次第應知。」

觀世自在菩薩白佛言:「世尊!世尊說諸波羅蜜各有幾種差別?」

佛言:「觀世自在!諸波羅蜜各有三種差別。觀世自在!檀波羅蜜 有三種,所謂法施、財施、無畏施;尸羅波羅蜜有三種,所謂離諸 惡行戒、修諸善行戒、利益眾生戒;羼提波羅蜜有三種,所謂忍諸 惡忍、忍諸苦忍、忍諸法忍;毘梨耶波羅蜜有三種,所謂發起精 進、修行善法精進、利益眾生精進;禪波羅蜜有三種,所謂無分別 寂靜極寂靜對治煩惱受樂行禪、起諸功德禪、起利益眾生禪;般若 波羅蜜有三種,所謂觀世諦般若、觀第一義諦般若、觀利益眾生般 若。觀世自在!是名諸法波羅蜜各有三種差別應知。」

觀世自在菩薩白佛言:「世尊!以何義故說諸波羅蜜名波羅蜜?」

佛言:「觀世自在!有五種義說名波羅蜜,所謂不著、不悕望、無過、不分別、迴向。觀世自在!不著者,所謂不著諸波羅蜜相違事;不悕望者,於諸波羅蜜受用果報報恩,中無求心;無過者,遠離諸波羅蜜無方便雜染法;不分別者,諸波羅蜜中不如所聞執著自相;迴向者,諸波羅蜜所作所集迴取大菩提果故。觀世自在!是故,我說名波羅蜜。」

觀世自在菩薩白佛言:「世尊!諸波羅蜜相違事有幾種?」

佛言:「觀世自在!波羅蜜相違事有六種。何等為六?所謂樂於五 欲資生自在,我受樂見功德利自在故;隨身口意行自在故;於他輕 惱心不堪忍故;著自身樂故;專念世間散亂行故;於世間中見聞覺 知名字分別為勝功德故。觀世自在!是名諸波羅蜜相違事。」

觀世自在菩薩白佛言:「世尊!世尊!何者是諸波羅蜜果報?」

佛言:「觀世自在!諸波羅蜜果報有六種應知。何等為六?所謂得富財故、趣善道故、無怨敵故、不壞多喜樂故、常為眾生主故、不 害自身故、大威德力故。觀世自在!是名諸波羅蜜六種果報。」

觀世自在菩薩白佛言:「世尊!何者是諸波羅蜜雜染法?」

佛言:「觀世自在!諸波羅蜜有四種不如法行,名為雜染。何等為四?所謂無慈心行故、不正念行故、不斷惡行故、不至心行故。」

觀世自在菩薩白佛言:「世尊!何者是不正思惟?」

佛言:「觀世自在!所謂修行諸波羅蜜離餘波羅蜜行,是名不正思惟。」

觀世自在菩薩白佛言:「世尊!何者是菩薩無方便修行?」

佛言:「觀世自在!若菩薩修波羅蜜行攝取眾生,但施飲食、資生等樂以為滿足,而不能令離不善處、置於善處,是名菩薩無方便修行。何以故?觀世自在!非施飲食如是等樂名為利益。觀世自在!譬如糞穢,若多、若少,無人能令生香美氣。觀世自在!如是,一切有為行苦、一切眾生自性諸苦,飲食、資生攝取眾生不可為樂。觀世自在!若置眾生在於第一上善法中究竟樂處,名為攝取與大利益。」

觀世自在菩薩白佛言:「世尊!世尊!此諸波羅蜜有幾種清淨?」

佛言:「觀世自在!我不說離五種清淨更有清淨。觀世自在!而我 依此五種清淨略廣說諸波羅蜜清淨之相。

「觀世自在!何者是略說諸波羅蜜清淨之相?觀世自在!一切波羅蜜有七種清淨。何等為七?所謂菩薩離我說法,復於他邊不求智慧故;此見諸法不生執著,知一切法能取大菩提故;不生異意、異疑故;不自讚歎、不毀他人故;不欺、不憍慢、不放逸故;得少善法不生滿足心故;得此諸法,於他人邊不生嫉妬、慳悋心故。觀世自在!是名略說諸波羅蜜七種清淨應知。

「觀世自在!我復廣說諸波羅蜜清淨之相,依彼七種說諸波羅蜜清淨。何等七種?觀世自在!我說諸菩薩摩訶薩檀波羅蜜七種清淨,如實修行。何等為七?所謂依悲心施清淨、施清淨即戒清淨、見清淨、心清淨、口清淨、智清淨、意清淨。是名檀波羅蜜七種清淨應知。

「觀世自在!如是,戒波羅蜜有七種清淨。何等為七?所謂菩薩摩訶薩於菩薩受持戒、如實知一切戒、如實能知離諸過法、彼法恒持堅固戒、至心戒、常隨順戒、於諸學中如實持戒。

觀世自在!是名戒波羅蜜七種清淨,應知。

「觀世自在!如是,羼提波羅蜜有七種清淨。何等為七?所謂菩薩自信業報,於諸一切不饒益事心不瞋恨;若罵、若瞋、若打,一切惡事來加其身,不生報心、不懷結恨;若彼求悔應時即受不令他惱;不求他求、不為有畏、不為飲食而行忍辱;於受他恩不忘還報。觀世自在!是名忍辱波羅蜜七種清淨應知。

「觀世自在!毘梨耶波羅蜜有七種清淨。何等為七?所謂菩薩如實知精進平等故、不為精進自高下他故、身體安住如山不動故、常勤精進故、心不怯弱故、所行堅固故、於諸善法起精進心不休息故。觀世自在!是名毘梨耶波羅蜜七種清淨應知。

「觀世自在!禪波羅蜜有七種清淨。何等為七?所謂菩薩善決定知 諸相三昧禪波羅蜜、滿足三昧禪波羅蜜、如實知二分三昧禪波羅 蜜、如實知隨順三昧去禪波羅蜜、不依止三昧禪波羅蜜、善練諸業 所作善三昧禪波羅蜜、觀菩薩藏無量三昧禪波羅蜜。觀世自在!是 名禪波羅蜜七種清淨應知。

「觀世自在!般若波羅蜜有七種清淨。何等為七?所謂離有、無 謗,中道般若,依般若力如實能知三解脫義,謂空、無相、無願; 如實能知三種:分別、他力、第一義諦;如實能知三種:名相、生 相、第一義相自體;如實能知世諦五明處;如實能知第一義諦;於 七種真如不分別、不戲論;一味多修行無量差別觀法、奢摩他、毘 婆舍那;隨聞如實修行成就。觀世自在!是名般若波羅蜜七種清淨 應知。」 觀世自在菩薩白佛言:「世尊!世尊!此五種觀,—一觀有何等 業?」

佛言:「觀世自在!此五種觀各有五業應知。何等為五?所謂菩薩不著現報,常至心行諸波羅蜜,不放逸故;不悕望報恩,攝取未來,不放逸故;無諸過失,能善滿足、善清淨、善白淨,修諸波羅蜜故;依無分別巧方便,速滿諸波羅蜜故;依迴向力,一切生處得善果報,依彼如實修行諸波羅蜜不盡,乃至得阿耨多羅三藐三菩提故。觀世自在!是名菩薩諸波羅蜜差別業應知。」

觀世自在菩薩白佛言:「世尊!世尊!此諸波羅蜜何者最勝?」

佛言:「觀世自在!所謂不悋資財、不著果報、迴向大菩提,觀世自在!是名最勝應知。」

觀世自在言:「世尊!何者是無染法?」

佛言:「所謂無諸過、無分別,是名無染法應知。」

觀世自在言:「世尊!何者為明妙?」

佛言:「所謂緣滅諸法應知。」

觀世自在菩薩白佛言:「世尊!世尊!何者是菩薩不動地?」

佛言:「觀世自在!菩薩入初歡喜地,具足大力,不退諸法,是名菩薩不動地應知。」

觀世自在言:「世尊!何等法是善清淨法?」

佛言:「所謂滿足十地乃至滿足佛地應知。」

觀世自在菩薩白佛言:「世尊!世尊!何故菩薩諸波羅蜜不盡,愛樂果報亦不盡?」

佛言:「所謂迭相因生妙果應知。」

深密解脫經卷第四

元魏天竺三藏菩提流支譯

聖者觀世自在菩薩問品之二

聖者觀世自在菩薩白佛言:「世尊!世尊!何故諸菩薩心不多樂諸 波羅蜜果報,而多樂諸波羅蜜行?」

佛言:「觀世自在!有五種法。何等為五?所謂樂於增上歡喜樂故、攝取自利利他故、樂未來世樂報恩故、不染諸法故、不失彼法故,應知。」

觀世自在菩薩白佛言:「世尊!世尊!此諸波羅蜜各有幾種勝妙之力?」

佛言:「觀世自在!此諸波羅蜜各有四種妙力應知。何等為四?一謂菩薩修行諸波羅蜜,遠離慳嫉心、遠離破戒心、遠離瞋心、遠離 懈怠心、遠離散亂心,遠離諸見心故;能成就阿耨多羅三藐三菩提 諸功德故;現身攝取自身他身故;於未來世能得廣大無盡愛果報 故。」

觀世自在菩薩白佛言:「世尊!世尊!此諸波羅蜜,何等為因?何 等為果?何等為力?」

佛言:「觀世自在!大悲為因、愛樂攝取眾生為果、能滿足菩提為力,應知。」

觀世自在菩薩白佛言:「世尊!世尊!若諸菩薩一切資財隨心所用不可窮盡,菩薩復有大悲愍心,何故世間貧窮眾生受種種苦?」

佛言:「觀世自在!此諸眾生自業罪過。菩薩大悲,常欲與諸一切 眾生無盡富樂,常懷憐愍,堅固不動。觀世自在!若諸眾生無自罪 障,世間無有貧窮眾生。

「觀世自在!譬如一切諸餓鬼等為渴逼惱,往見一切諸河、大海悉皆乾竭。此非諸河、大海過咎,是諸餓鬼自罪業報。諸菩薩等施諸眾生一切資財,如彼大海無有過咎;而諸眾生受貧窮苦,如彼餓鬼自作惡業有如是報,非菩薩過。」

觀世自在菩薩白佛言:「世尊!世尊!菩薩何等波羅蜜取諸法無體相?」

佛言:「觀世自在!般若波羅蜜取諸法無體相。」

觀世自在言:「世尊!若菩薩般若波羅蜜取諸法無體相者,世尊! 何故般若波羅蜜不取諸法有體相?」

佛言:「觀世自在!我說取無體相,無體相者,汝當莫著言語。何以故?無體相法離諸一切名字、言語,內身證法,不可以名字、章句說,我依名字說言般若取諸法無體相。」

觀世自在菩薩白佛言:「世尊!如世尊說諸波羅蜜、隨近波羅蜜、 大波羅蜜。世尊!何者是波羅蜜?何者是近波羅蜜?何者是大波羅 蜜?」

佛言:「觀世自在!菩薩從無量劫修行布施等諸波羅蜜,畢竟能得一切善法,而彼菩薩具煩惱性現行於心,而彼煩惱不能染菩薩,而菩薩能降伏煩惱——謂信行地——於軟中信心而修諸行,是名波羅蜜。

「觀世自在!復有無量劫時畢竟修行增上善法,心行煩惱,而彼菩薩能伏煩惱、煩惱不能降伏菩薩,謂未入初地應知,觀世自在!是

名近波羅蜜。

「復次,觀世自在!菩薩於無量劫畢竟修行上上善法,彼菩薩一切 煩惱不行於心,所謂初地至八地、第十地。觀世自在!是名大波羅 蜜應知。」

觀世自在菩薩白佛言:「世尊!世尊!此諸地中有幾種使煩惱?」

佛言:「觀世自在!有三種使煩惱。何等為三?所謂害伴使煩惱、薄使煩惱、微細使煩惱。觀世自在!何者害伴使煩惱?謂從初地乃至第五地不俱生煩惱。俱生煩惱伴彼菩薩,害伴使煩惱不行於心,是故我說害伴使煩惱。觀世自在!何者是薄使煩惱?謂六地、七地中微細無明使煩惱。菩薩修行薄彼無明煩惱,是名薄使煩惱。觀世自在!何者微細極微細煩惱?謂八地、上上地,一切無明使煩惱不行於心,唯有一切境界微細障。觀世自在!是名三種使煩惱應知。」

觀世自在菩薩白佛言:「世尊!世尊說菩薩斷一切過得斷諸使。世尊!菩薩斷幾種過名斷諸使?」

佛言:「觀世自在!菩薩斷三種過能斷諸使。何等為三?所謂皮、 膚及骨。觀世自在!初斷皮障離第一過、次斷膚障離第二過、次斷 骨障離第三過,我說一切使盡是名佛地應知。」

觀世自在菩薩白佛言:「世尊!世尊!幾阿僧祇劫斷彼諸過?」

佛言:「觀世自在!三大阿僧祇劫、無量時、無量月、無量半月、無量夜、無量畫日、無量念、無量剎那、無量無睺多、無量羅婆劫 斷彼諸過應知。」

觀世自在菩薩白佛言:「世尊!此諸地中諸菩薩煩惱有何等相?有何功德?願為我說,而我應知。」

佛言:「觀世自在!無有染相生諸煩惱、無量功德生諸煩惱應知。何以故?菩薩於初地中自性證於一切法界,善能覺知一切法界。是故,菩薩如實能知生諸煩惱,非為不知。是故,於自身中無有染相,以不能生諸苦過故;無有諸過,為眾生界斷因果故,菩薩無量功德是煩惱生。」

觀世自在菩薩言:「希有,世尊!是大菩提能大利益,以諸菩薩生 諸煩惱降伏一切聲聞、緣覺一切善根,何況諸餘無量功德?」

觀世自在菩薩白佛言:「世尊!如世尊說聲聞乘、大乘是為一乘。 世尊!何意作如是說?」

佛言:「觀世自在!我聲聞乘中說種種法——所謂五陰、內六入、 外六入——如是等我說彼法界一味,而彼聲聞不能覺知。是故,我 說有種種乘。觀世自在!如有眾生聞說如是,分別執著,彼人不知 一乘之體,取種種乘而證彼法,異異而取迭共諍論。我意如是應 知。」

爾時,世尊而說偈言:

「種種諸法相, 我依一理說, 生於下劣解, 我說名二乘。 如聞聲分別, 而不知彼義, 故諸乘相違, 憍慢眾生諍。 知諸地妙相、 及諸願生處, 此勝相對治, 我說是大乘。」

爾時,觀世自在菩薩白佛言:「世尊!深密解脫修多羅中,此法門者名為何等?云何奉持?」

佛告觀世自在菩薩言:「觀世自在!此修多羅名『地波羅蜜了義法門』,汝今應當如是受持。」

說此「地波羅蜜了義經」時,七萬五千菩薩得大乘光明三昧。

聖者文殊師利法王子菩薩問品第十一

爾時,文殊師利法王子菩薩摩訶薩,依如來所作住持業差別,白佛言:「世尊!世尊!如來法身有何等相?」

佛告文殊師利:「如實修行十地波羅蜜,轉身成就得妙法身,是名 諸佛如來法身相應知。

「文殊師利!彼佛法身有二種相不可思議。何等為二?所謂法身離諸戲論、離諸一切有為行相,而諸眾生執著戲論、有為行相。」

文殊師利白佛言:「世尊!聲聞、緣覺轉身所得,為是法身?為非 法身?」

佛告文殊師利:「非法身也。」

文殊師利白佛言:「世尊!若非法身,是何等身?」

佛言:「文殊師利!名解脫身,非法身也。依解脫身,聲聞、緣覺、諸佛如來其身平等,而佛法身差別殊勝。法身勝者,勝彼一切聲聞、緣覺無量無邊阿僧祇功德,奇特殊勝不可為譬。為分別顛倒對治,彼人說如來生。」

文殊師利白佛言:「世尊!諸佛生世有何等相?」

佛告文殊師利:「化身生相隨世界相,一切種一切功德莊嚴住持相相應,是即化身生世間相應知。文殊師利!而佛如來法身不生。」

文殊師利白佛言:「世尊!我云何知化身所作現方便相?」

佛告文殊師利:「一切佛國土三千大千世界中大勢力家及福田家一時退,入胎、住胎、出胎,生已增長,受五欲樂,而行大捨出家苦行、證菩提、轉法輪、入涅槃。文殊師利!是應化身所作方便示現應知。」

文殊師利白佛言:「世尊!世尊!依如來法身住持力,幾種語為眾生說法——如來說法依可化眾生、未熟者令熟、已熟者令得解脫?」

佛言:「文殊師利!如來有三種語。何等為三?謂說修多羅、毘尼、摩得勒伽。文殊師利!是為三種應知。」

文殊師利言:「世尊!何等修多羅?何等毘尼?何等摩得勒伽?」

佛言:「文殊師利!我所說少事法,是名修多羅。少事法者,謂四種事、九種事、二十九種事。

「文殊師利!所言四種事者,謂聞事、歸依事、學事、菩提事,是 名四種事。

「文殊師利!所言九種事者,謂施設事、眾生向受用事、向生事、 向生住事、向染淨事、向種種事、能說事、可說事、眷屬事,是名 九種事。

「文殊師利!所言二十九事者,謂依煩惱對染諸行事隨順事。

「何者是隨順事?謂隨順彼人相。未來世生因事故,依法相未來行 因事,依淨分觀事,即彼處修行事。令心住事、現身受樂法行事、 過一切苦觀行事,即如實知彼事。

「彼事有三種:依顛倒住持故、依眾生相外觀邪行住持相故、內心 無憍慢住持故。 「修行住事、現證事、修行事、作向堅固事,觀彼九種事:觀察遠離不遠離方便事、向散亂事、不散亂、不失事、修行無障礙事、修 行利益事、向堅固事、向彼實證事、具足得涅槃事。

「如來善說毘尼法——世間正見,出諸外道一切勝事——不修行彼 法退事。何以故?文殊師利!若於如來善說毘尼法中不能修行,令 善法退,非邪見過。」

文殊師利言:「世尊!何者是毘尼相?」

「文殊師利!毘尼相者,我為聲聞及諸菩薩說波羅提木叉及波羅提木叉相應法,是名毘尼事。」

文殊師利言:「世尊!菩薩有幾種法攝波羅提木叉?」

佛言:「文殊師利!菩薩有七種法攝波羅提木叉。何等為七?所謂菩薩知說受持法、知說波羅夷事、知說過事、知說過事體、知說無過事體、知說起過事、知說是過事。文殊師利!是名菩薩七種法攝波羅提木叉應知。」

文殊師利言:「世尊!何者是摩得勒伽?」

「文殊師利!我所說十一種相示現了義經,是名摩得勒伽。」

文殊師利言:「世尊!何等是摩得勒伽十一種相?」

佛言:「文殊師利!所謂世諦相、第一義諦相、觀菩提分法相、彼 法相、自體相、彼法果相、受彼法說相、彼法障相、彼法隨順相、 彼法過失相、彼法利益相。」

文殊師利言:「世尊!何者是世諦相?」

「文殊師利!世諦相者有三種。何等為三?說人相、說分別體相、 觀諸法思惟作種種業相,應知。」

文殊師利言:「世尊!何者第一義諦相?」

「文殊師利!第一義諦相有七種,如前七種真如中所說:一者、所 謂無始有為行相第一義諦;二者、相第一義諦,所謂我空、法空; 三者、唯識第一義諦,知有為行唯是心識;四者、執著第一義諦, 所謂我說苦諦;五者、邪行第一義諦,所謂我說集諦;六者、清淨 第一義諦,所謂我說滅諦;七者、正修行第一義諦,所謂我說道 諦。

「文殊師利!行相第一義諦、執著第一義諦、邪行第一義諦,此三 第一義諦一切眾生平等無差別。文殊師利!相第一義諦、唯識第一 義諦,此二第一義諦一切法平等無差別。文殊師利!清淨第一義 諦,聲聞、緣覺、菩薩阿耨多羅三藐三菩提平等無差別。

「文殊師利!正修行第一義諦,如聞妙法差別,觀奢摩他、毘婆舍 那攝取般若波羅蜜平等無差別應知。」

文殊師利言:「世尊!何者是觀菩提分法相?」

「文殊師利!觀菩提分法相者,所謂觀一切種事應知。」

文殊師利言:「世尊!何者是彼法相?」

「文殊師利!彼法相者如八種觀中應知。」

文殊師利言:「世尊!何等八種觀?」

「文殊師利!所謂依實諦、住諦、過失、功德、通相、形相、相應相、廣略說相。

「文殊師利!實諦相者,所謂真如。

「住諦相者,所謂人相、分別差別體一向答相、隨問分別答相、置 答相、密事示現相。

「過失相者,所謂我說諸法染過。

「功德相者,所謂我說一切淨法無量利益相。

「通相者,有六種應知。何等六種?謂真實義通、得通、說通、離二邊通、不可思議通、意通。

「形相者,所謂三世三有為相四種因緣。

「相應相者,有四種應知。何等為四?謂相待相應、能作所作相應、生相應、法體相應。相待相應者,謂何等因、何等緣能生有為行、名字等用,是名相待相應。能作所作相應者,何等因、何等緣能得法、能生法,能生法已能成辦業,是名能作所作相應。生相應者,謂何等因、何等緣知法、說法、示法,能成能正覺知,是名生相應。法體相應者,略說有二種。何等為二?謂一者、淨,二者、不淨。

「文殊師利!淨有五種相,不淨有七種相。

「文殊師利!何者淨五種相?一者、彼現前見相,二者、依彼現前 見相,三者、自相譬喻相,四者、成就相,五者、說清淨阿含相。

「文殊師利!何者是彼現前見相?調一切有為行無常、一切有為行苦、一切法無我,世間現前見法如是等,是名彼現前見相,應知。

「文殊師利!何者是依彼現前見相?所謂一切諸有為行一相故,不 失未來善、不善業;依彼麁法現見故、依種種業見種種眾生現見 故、依善不善業受苦受樂現見故,於現見法中譬喻。如是等彼依止現見相應知。

「文殊師利!自相譬喻相者,所謂內、外、一切世間現見譬喻因緣。如是等名為自相因緣譬喻應知。

「如是,依彼現見相、依止彼現見相、譬喻相一向成就彼事,名為 成就相應知。

「文殊師利!何者是說清淨阿含相?所謂一切智人說彼寂靜涅槃之相。如是等名清淨阿含相應知。

「文殊師利!汝應如是深觀察五種清淨相,深觀察已知清淨,知清淨已修行應知。」

文殊師利白佛言:「世尊!有幾種法知一切智人相?」

佛言:「文殊師利!有五種法知一切智人相。何等為五?有人出世於諸一切天人世間名一切智,有人畢竟成就三十二大人之相、得十力法能斷一切眾生疑、具四無畏降伏一切諸魔怨敵、說法更無能作礙難、於說法中善說八聖菩提道分,現證成就四沙門果。

「文殊師利!如是,依生、依相斷疑降伏,無人能難,現見沙門五種法現前,是名一切智人相應知。

「文殊師利!此依生成相應、現見相應、量相應、比智相應、聖人 說法相應,知五種相是名清淨相應知。

「文殊師利!何者是七種不清淨相?所謂彼相似見相、彼不相似見相、有一切相似見相、一切不相似見相、自譬喻異相、不成相、說 法不清淨阿含相。 「文殊師利!何者是有一切相似見相?謂一切法依意識知同相,如 是等名為一切法相似同見相。

「文殊師利!何者是一切法不相似見相?謂法相、體相、業法因果 異相、一一相、異相、畢竟彼彼相、待異相,如是等是名一切不相 似不同見相。

「文殊師利!何者是自譬喻異相?謂彼相似見相譬喻中有一切不相似不同相,為成彼事一向不成,是故我說彼不成相。

「文殊師利!自譬喻中彼不相似見相有一切相似同相,為成彼事一 向不成,是故我說不成相。

「若不成相者,彼法不清淨;若法不清淨者,不應修行。是故,我 說不清淨阿含相,以自性不清淨應知。

「文殊師利!何者是法體?所謂:如來出世及不出世,法住、法體、法界,是名法體相應知。」

文殊師利言:「世尊!何者是略廣相?」

「文殊師利!所謂略說一句——彼一句、上上句、差別無量句、乃 至說應至處——是名略說應知。」

文殊師利言:「世尊!何者是得相?」

「文殊師利!謂取諸法見觀菩提分法,我說菩提分法四念處等,是 名彼法自體相。共世間、出世間、遠離染相,彼法果起世間、出世 間功德,是名彼得相。文殊師利!即彼法依解脫智受用,應知、廣 為人說示現,是名彼法隨順示現相。文殊師利!即彼修行菩提分 法,離道相違染法,是名向障法應知。文殊師利!為彼法多生增 長,是名隨順彼法相。文殊師利!障諸法是名過相。文殊師利!隨順彼法功德是名利益相,應知。」

爾時,文殊師利菩薩白佛言:「世尊!惟願世尊為諸菩薩更重略說修多羅、毘尼、摩得勒伽義,不共一切外道、二乘陀羅尼相。諸佛如來說甚深法,諸菩薩得甚深意,得已能入一切佛法。」

佛告文殊師利:「汝今諦聽,我當為汝略說陀羅尼義。諸菩薩等聞 我法已,能得我意;得我意已,入於我法。

「文殊師利!何者略說陀羅尼義?所謂我說一切染法、一切淨法、 彼一切法、不覺相、無作相、無分別相、無我相,如是如是法。我 說不覺、無作、無分別、無我相,以一切無覺無我相,是故染法, 非先是染,後時得淨;諸淨法者,亦非先淨,後得名染。愚癡凡夫 依虛妄染身執著我法,計自體相,依因邪見而言有我一一所謂我能 見、能聞、能嗅、能味、能觸、我能知、我能食、我染、我淨一一 生如是等諸邪見行。若人如是如實能知離煩惱身,彼人能得離諸煩 惱、斷諸戲論、畢竟清淨,得無為身,無有一切諸有為行。文殊師 利!是名略說陀羅尼義應知。」

爾時,世尊而說傷言:

「諸法本無染、 後時不清淨, 染及於清淨, 是諸法無我。 染身見有我, 生於我所相、 我染及清淨、 我見及以食。 若能如是知, 彼人離煩惱, 能得無染身, 是故名無為。」

文殊師利菩薩白佛言:「世尊!世尊!如來心生有何等相?願為我說。」

佛告文殊師利:「文殊師利!如來非心意意識得名,而無諸行心生 得名,依應化身說名為生。」

文殊師利言:「世尊!若法身離於諸行,云何離作心行而能生心?」

佛言:「文殊師利!依本方便般若修行自然而生。文殊師利!譬如 睡眠,無心覺起而能覺起。文殊師利!如入滅盡定而無起心,依本 作心自然而起。文殊師利!如眠、滅定二無起心,依本而起;如 是,如來心生,依本般若方便修行成就應知。」

文殊師利菩薩白佛言:「世尊!世尊說如來應化所作化身,為是有心?為是無心?」

佛言:「文殊師利!得言有心、得言無心。何以故?以自心不得自 在故,言無心;假他力故,言有心。」

文殊師利白佛言:「世尊!如世尊說,如來行處、如來境界,此二種法有何差別?」

佛言:「文殊師利!言如來行處者,一切諸佛功德平等不可思議、無量功德莊嚴清淨佛之國土,是名諸佛如來行處。文殊師利!言如來境界者有五種。何等為五?所謂眾生界、世界、法界、可化眾生界、方便界。文殊師利!如來行處、如來境界如是差別應知。」

文殊師利菩薩白佛言:「世尊!世尊!如來得大菩提、轉大法輪、 入大涅槃,此三種相云何差別?應云何知?」

佛告文殊師利言:「文殊師利!無有二相,不證菩提、非不證菩提,不轉法輪、非不轉法輪,非入大涅槃、非不入大涅槃。」

文殊師利言:「世尊!我解世尊所說之義。何以故?如來法身本來 常清淨故、應化身示現故。」

文殊師利言:「世尊!眾生見彼應化之身、聞應化身、解應化身、 供養讚歎應化之身,得諸功德,於何身得?」

佛言:「文殊師利!以能正念如來身故,以應化身依如來法身住持力得。」

文殊師利白佛言:「世尊!世尊等無心、無作、無行,何義故如來 法身為諸眾生出大光明及出無量應化鏡像,而諸聲聞、辟支佛等解 脫之身無如是相?」

佛言:「文殊師利!等無心、無作,譬如日、月、摩尼珠等,為諸眾生出大光明及種種物,而水、琉璃、頗梨珠等無心、無作,不出一切光明等物。何以故?依大眾生住持力故、依諸眾生增上業故。文殊師利!譬如善巧練治珠寶能出影像,餘不善者不出光明。文殊師利!諸佛如來亦復如是,依無量法正觀修行方便般若,作諸善業、集諸善根,依佛法身方便智慧出諸光明及出無量應化色像;聲聞、緣覺解脫之身不能修集一切善根,故不能出。」

文殊師利菩薩白佛言:「世尊!世尊說依諸佛菩薩住持力故,一切 眾生成就世間功德之身——所謂生於剎利婆羅門、大長者家、欲 界、色界、無色界、一切處、一切身——一切功德果報成就皆依諸 佛及諸菩薩住持力得。世尊!何意作如是說?」

佛言:「文殊師利!如來住持之力及菩薩力,隨說何等道、何等修行,若有人能依於彼道如實修行,彼人一切生處、一切身、一切世間果報成就。文殊師利!若人不能信於彼道,又復不能如實修行,謗我法、諍我法,而於我身生惡瞋心,彼人命終一切生處常得一切下劣惡身、受惡果報。文殊師利!依於此義,汝今應知,非但成就

上妙勝身及勝果報依佛如來住持力,得下劣惡身及惡果報亦依如來住持力得。」

文殊師利白佛言:「世尊!世尊不淨國土中,何法易得?何法難得?世尊!淨佛國土中,何法易得?何法難得?」

佛告文殊師利言:「文殊師利!不淨國土中有八事易得、二事難得。何等為八?所謂外道易得、受苦眾生易得、生下姓家勢力敗壞易得、惡行眾生易得、破戒眾生易得、入惡道眾生易得、發下品心小乘眾生易得、發菩提心菩薩狹劣心易得。

「文殊師利!何者二事難得?高心修行菩薩難得、諸佛如來出世難得。文殊師利!淨佛國土中八事難得、二事易得,應如是知。」

爾時,文殊師利法王子菩薩白佛言:「世尊!此深密解脫修多羅中,此法門當名何等?云何奉持?」

佛告文殊師利法王子菩薩言:「文殊師利!此法門名『說諸佛如來 住持力了義經』。文殊師利!如來所說了義修多羅,其義如是,汝 當奉持。」

說此如來住持力了義經時,七萬五千菩薩得滿足法身。文殊師利法 王子菩薩摩訶薩及諸一切天、人、阿修羅大眾,歡喜奉行。

深密解脫經卷第五

CBETA 贊助資訊

(http://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".